3930 Blees





## 

#### مصطفىمحمود

# 

الطبعةالخاسة



### أشخاص المسرحية

الحاجة زنوبة : عجوز حول الثمانين

الحاجة هنومة : أختها

مراد الشوربجي : ابن زنو بة .. محام وصاحب أطيان

دكتور أحمد الشوربجي : ابنها الثاني : طبيب

نفيسة : بنتها العانس

چيچى : بنت مراد.. وحفيدة الحاجة زنوبة

شفیق : زوج چیچی

ممدوح

إلهام : أبناء چيچى

عادل

الأستاذ لاشين : المخرج

الأستاذ السبكى : المنتج

خادمة

فرقة الإنقاذ

أطفال بلا أسهاء

### الفصهلالأول

غرفة جلوس مؤثثة على الطريقة القديمة .. نجفة موديل قديم مدلاة من السقف .. أشغال كانفاه معلقة على الحائط .. ستارة مشغولة .. آية قرآنية في برواز .. صورة للمرحوم الحاج الشوربجي .. كراسي عربية .. مبخرة يخرج منها دخان البخور وخادمة تضع البخور .

الحاجة زنوبة تجلس على سجادة صلاة تختم صلاتها بدعاء طويل وابتهالات وشفاعات لأقاربها الأحياء والأموات .

والحاجة زنوبة حيزيون سنها جاوز الثمانين .. مازالت محتفظة بصحتها .. ومازالت تقطع الطريق من بيتها إلى المقام الزينبي الطاهر ماشية على قدميها وتصحو من الفجر لتصلى الفرض بفرضه .

وحينها تزاح الستار تكون الحاجة مشغولة بمسبحتها التعمني الموت أجش مرتفع :

- لا إله إلا الله والحمد لله ولا حول ولا قوة إلا بالله الأمر لله والملك لله .. يارب اجعل لى فى كل خطوة سلامة ، واسترها على فى الدنيا وفى الآخرة ، واسترها على أولادى وأولاد أولادى واقبل صلاتى واجعلها رحمة على أمواتى وأموات أمة المسلمين أجمعين .. الفاتحة لروح أبويا فى تربته .. بسم الله الرحمن الرحيم الحمد لله رب العالمين ، إياك الرحمن الرحيم ، مالك يوم الدين ، إياك نعبد وإياك نستعين ( تخرج فجأة من الفاتحة وتخاطب الخادمة بغضب ) :
- بنت يا سكينة .. فين الواد الكلب .. ؟ ماجاش لغاية دلوقت ؟؟ !!
  - كلب مين يا ستى بعد الشر ..
- سيدك مراد .. مش قال النهاردة معاده حايجمع إيجارات الأرض ويجيبها .
  - ما هو جه يا ستى .
- جه .. ؟؟ إزاى .. جه فين وامتى .. وما جاش ليه عندى .. إجرى اندهيه

تخرج الخادمة وتعود العجوز إلى تسبيحها.

- يارب اجعل لى فى كل خطوة سلامة واسترها على على فى الدنيا وفى الآخرة ، واسترها على أولادى وأولاد أولادى واقبل صلاتى واجعلها رحمة على أمواتى وأموات أمة المسلمين أجمعين .. الفاتجة لروح أبويا فى تربته ... يدخل الواد الكلب وهو مراد الشوربجى رجل فى الخمسين يبدو عليه الوقار .

- أنت فين يا وله ( تمد يدها ليطبع عليها قبلة الطاعة ) .. غطسان فين .. قبضت فلوس العزبة وعاوز تضرب عليها عواني .. ؟؟

- وده معقول يامه ؟ ..

- فين الفلوس .. إيدك

يضع يده في جيبه ويخرج حزمة من البنكنوت.

– آدی ۲۰۰ جنیه

تأخذ البنكنوت وهي تحملق في وجهه

- والباقى ؟؟

- باقى إيه يامه !! ؟؟

- يا راجل خلى فى عينك حصوة ملح .. ميتين جنيه من ستين فدان .. يعنى إيه .. يعنى

- واخد في الفدان تلاتة جنيه إيجار ( تضع النقود في عبها :
- الفلاحين ما بيدفعوش يامه .. الدودة كلت القطن .. والنيل غرق الذرة .. حايدفعوا منين ؟ ..
- يدفعوا زى ما بيدفعوا كل سنة .. وزى ما كان أبوك الحاج الشوربجي بيدفعهم
- دلوقت ما نقدرش نضغط ع الفلاحين زى زمان .. دلوقت أيام .. وزمان أيام يا حاجة
- أمال إذا ما كنتش محامى أبوكاتو وراجل قانون تعرف القانون وحكم القانون ..
  - إنتى شفتى الفلاحين يا حاجة .. ؟
- حد الله ما بيني وما بينهم .. أشوفهم أعمل بيهم إيه ..
  - لو کنتی شفتیهم کنتی عذرتیهم زیی
- يين بالله يا مراد يابن الشوربجي إنك متساوى مع الفلاحين بتوعك دول .. وانتوا الاتنين واكلين فلوسى ومتقاسمين حقى .. بقى بذمتك الميتين جنيه دول هم كل اللى قبضته من إيجار الأرض ؟ .

  يذهب إلى أمه ويقبل يدها باحترام

- عيب يامه آكل حقك .. ده أنا من لحمك ومن دمك .
- ومال عينيك فيها لؤم كده .. يا خسيس .. أنا عارفه .. كلكم مستنين موتى النهاردة قبل بكره .. لكن لسه بدرى .. لسه بدرى يا ولاد الشوربجي .
- ربنا يديكى العمر يا حاجة ويخليكى .. يارب اللى يتمنى موتك يجيله عزرائيل .. هو احنا من غيرك نعرف نعيش .. ده إنتى خيرنا وبركتنا .. وحبوبتنا (يهشكها) ومامتنا ..
- وإيه كمان .. وإيه كمان يابن الشوربجى .. أنت ناوى تديني باقى الحساب كلام
- ( محادثا نفسه على جانب من المسرح ) .. دا مفيش فايدة .. حا اعمل إيه في الولية الباشمحضر دى ..
- (مادة يدها) باقى الإيجار يا مراد يا شوربجى
- يامه الفلاحين السنة دى ع الحديدة .. والضرب في الميت حرام .. الفلاحين لو دبحناهم مش حانطلع منهم مليم ..

حاناخد حقنا منهم ازای .. حانحجز علی إيه .. المحصول .. ؟؟ !! مفيش محصول .. مفيش في الأرض لوزة قطن توحد الله - أيوه خش عليه بشغل اللارنجة خش .. عاوزني أصدق إن مراد بن الشوربجي يرحم فلاح ويعذره في قرش .. مراد اللي واكل لحمى بالحيا .. أنا اللي اسمى أمه .. مراد اللي ماصص دم البلد بالطاحونة اللي عاملها ع الجسر بيطحن بيها فلوس .. وبابور الميه اللي بيسقى بيه الغيطان بالقطارة .. ومكنة الحليج اللي مدابن بها كل كبير وصغير ومدورها على أرزاقنا .. هو ده مراد اللي بيعيط ع الفلاحين وع اللي جرى للفلاحين .. وعاوزني أصدق كلامك .. تكونشي فاكرني دقة عصفورة ؟ . تقاطعه بشدة وبصوت أجش صارم:

- الفلوس يا مراد .. مش عايزة كتر كلام .. تطلع تنزل تجينهم من تحت الأرض .. آخر ميعاد لك بكره .. فاهم إمشى انجر قدامى . تعطيه يدها ليقبلها قبلة الطاعة فيطبع عليها القبلة في غيظ .. ويخرج تعود الحاجة إلى مسبحتها

وتنادى على الخادمة:

- سكينة .. سكينة .. يت يا سكينة

- أيوه يا ست

- اندهى لستك هانم (محادثة نفسها وهى تلوح بيدها فى حزن) هانم أختى فين .. ما عادش لى فى الدنيا غيرها .. هى اللى قلبها عليه .. وروحها فيه .. كلهم عاوزين ياكلونى بالحيا .. كلهم طمعانين فيه .. مفيش غير هانم هى اللى بتعطف عليه .. هى اللى بلاقيها جنبى فى الحلوة والمرة (تنادى) .. بلاقيها جنبى فى الحلوة والمرة (تنادى) .. يا هانم .. يا هانم .. يا هانم .. يا هانم .. هنومة .. تدخل هنومة .. وهى كركوبة مثلها .. سنها هى الأخرى حول الثمانين .. عجوز .. كحكوحة .. وشعرها مصبوغ بالحناء وعليه منديل أويه .. ومشيتها بطيئة متهافتة ..

- هنومة .. أنت فين ياختى بذور عليكى .. تعالى (تجلس هنومة إلى جوارها على السجادة) .. ما بقاليش حد فى الدنيا غيرك .. الطمع ما خلاش فى الدنيا خير .. شايفة الواد الكلب عمل إيه .. خد إيجار الأرض حطه فى جيبه .. وقال إيه ..

- الفلاحين غلابة مش لاقيين يأكلوا .. حايدفعوا منين .. قلبه على الفلاحين .. المجرم .. قتال القتلى ..
- كلهم كده ياختي .. ماشفتيش توفيق عامل في إيه .. اهو واخد أرضى بيأجرها ومش طايلة منه أبيض ولا أسود وفلوسى باخدها منه شقارة ونقارة ( تلوح بيديها في استسلام ) لنا رب اسمه كريم
  - ربنا بحب الحق يا هنومه
- أهل الباطل ما خلوش لأهل الحق حاجة
  - يا ويلهم من ربنا .. يا ويلهم ..
- الحمد لله عشنا طول عمرنا بالحق .. ربنا يحيينا على الإيمان ويميتنا على الإيمان
  - نفسی أحج السنة دی یا هنومه
- ونكون سوا والنبى .. ونشاهد الحبيب سوا ونحط إيدنا على شباكه .. يا حبيبى يا رسول الله (تخبط على كتفها في تودد) ياختى مين قدك .. حجيتى سبع حجات وطفتى السبع طوفات .. وطلعتى عرفات سبع طلعات .. مين قدك يا زنوبة ياختى .. ياما نفسى أكمل حجاتي سبعة زيك .. ده أنت

مغفور لك في الدنيا وفي الآخرة

- نفسى أكملهم تمانية يا هانم عشان يبقى لى قصر في الجنة .. الشيخ مسعود بيقول اللي يحج تمان حجات يتكتب له قصر في الجنة .. في الروضة القدسية جنب الحبيب.

- يا سلام .. ربنا يوعدنا .

- (تشاور بيديها) أوعدني يارب أوعدني تدخل سكينة الخادمة .. تقف لحظة جوار الباب .. ثم تقول في تردد:

- فيه إيه ···

تقترب من زنوبه ثم تقول في صوت خافت:

- خاله بهانه واقفه ع الباب بتعيط

- يا عيني ياختي على بهانه واللي جرالها .. ابنها مات في شبابه يا حسرتي عليها ( تنهنه بدون دموع وتمسح عينيها بمنديل وتنهنه معها هنومه .. وينخرط الاثنتان في النهنهة) إتخطف منها يا ضنايا .. يا عيني يا بني .. يا حرقة قلبي عليه .. (نهنهة)

الخادم تقاطعها:

- خاله بهانه بتقول:

- یا عینی یاختی علی بهانه واللی جرالها
   ( نهنه )
  - خاله بهانه بتقول:
- كان مستخبيلك ده كله فين يا بهانة .. يا ميلة بختك با بهانة
- خاله بهانه بتقول الحتة الأسورة اللى عندها مرهونة .. ومفيش عندها ولا مليم في البيت وبدها تسألك في جنيه سلف تشتري بيه دره للعيال
- تفيق زنوبة فجأة من النهنهة وتتحول لهجتها إلى لهجة خشنة جافية .
- جنیده .. !! ؟؟ ومافهمتهاش لیده یا سکینة . ؟؟ وأنا حاجیب لها الجنیه منین .. وأنا قاعدة لها علی کنز .. وأنا بازرع والا باقلع .. مش لها راجل بیجری علیها بتقول حا تاخذ الجنیه سلف .. وحاترده علی أول البرسیم
- السلف تلف والرد خسارة .. وهي لاقية تاكل عشان ترد اللي عليها
- زكا عنك يا ستى .. كأنك طلعتيه لله .. دى غلبانة ولا لهاش حد

- طلعت روحك من جنتك .: إمشى انجرى بره انتو مفيش حواليكو إلا الشحاته .. انتو مفيش وراكو إلا حلب الفلوس .. الفلوس .. ماحدش يخش لى إلا الفلوس .. الفلوس .. ماحدش يخش لى إلا عشان يجرجر فلوس .. إمشى انخفى من قدامى .. إوعى تورينى خلقتك تانى تخرج الخادم .. وتعود زنوبة تشلشل بيديها خرج الخادم .. وتعود زنوبة تشلشل بيديها حكمهم طمعانين فيه .. كلهم عايشين معايا على طمعة .. آدى أنت شايفة مفيش حد بيحن
  - حلهم طمعانين فيه .. كلهم عايشين معايا على طمعة .. آدى أنت شايفة مفيش حد بيحن عليه .. مفيش حد بيعطف عليه .. مفيش حد بيقولى يا زنوبة مالك .. يا زنوبة عاوزه إيه .. (نهنهة) ماعندهمش إلا يا زنوبة هاتى .. يا زنوبة ادفعى .. يا زنوبة ادفعى .. يا زنوبة سلفينى .. يا زنوبة أدينى .. كل واحد عاوز ينهبنى .. كل واحد عاوز ينهبنى .. كل واحد عاوز واحد عاوز عامد عاوز عامد عاوز يورثنى بالحيا .. كل واحد عاوز معنيه على القرشين اللى عموشاهم
  - وأنت محوشة إيه يا حسرة .. مش القرشين بتوع
  - بتوع خرجتی یاختی والنبی ما فی غیرهم .. خایفة أموت ویشیعونی زی الکلبة .. من

غير صوان .. من غير نصبه .. من غير فقها عليهم القيمة يقروا في ليلة وحدتى .. من غير ما يطعموا يتيم على روحى . نفسى أبنى لى مدفن غير المدفن المهدود اللي زى الخرابة اللي بنرمى فيه أمواتنا كأننا بنرميهم في مدلق زبالة ..

نفسى أبنى لى مدفن عليه القيمة .. فيه حوش ومندرة وتركيبة رخام ونور وميه وحوض فيه زرع .. طول عمرى بحب الخضرة .. ونفسى أموت وجنبى خضرة عسك بأختها هانم من يديها وتتشبث بها في شدة وهي تهزها:

- أمنتك أمانة يا هانم يا بنت شناوى لو مت قبلك لتكون خرجتى من عندك .. إنت اللى تطلعينى بإيديكى دول ..
- يوه .. يا زنوبة ماتقوليش كده ياختى .. أنا في قلب أسمع الكلام ده .. ؟؟ إلهى يا رب ما أعيش .. ولا أشوف اليوم ده أبدا ( تلوح بذراعيها في حركة ندب ) إلهى ما أعيش ولا يوم بعدك أبدا ياختى .. يا حبيبتى ياختى .. وأنا يبقى لى مين بعدك ياختى ..

- زنوبة تتشبث بها أكثر وأكثر ..
- حلفتك بالنبى اللى زرتيه وحطيتى إيدك على شباكه .. ما حد يطلعنى غير إيديكى دول .. عاوزه طلعتى تكون طلعة أبهة من مقام بيت شعراوى .. ومن مقام الحاجة زنوبة مرات العمدة وأم الرجالة وجدة الولاد الحلوين اللى منورين الدنيا ..
  - يوه .. ياختى برة وبعيد .. إنتى فين والموت فين ..
    - زنوبة تتشبث بها أكثر وأكثر ..
- الفقها لازم يكونوا من الفقها بتوع الإذاعة .. والعجول لازم تندبح للفقرا على طول الطريق من مصر لبسيون .. والدوار في بسيون يتفتح للمعزيين ياكلوا طول الأسبوع .. سبعة أيام بلياليهم . والجنازة تطلع قدامها صفين عسكر زى جنازة المرحوم الحاج شناوى .
- والطقم المذهب بتاعى يتحط فى المدفن وحرير الكفن والليف والصابون والحنة أنا شارياه على يدك وانتى عارفه هو فين وعارفه تحويشة العمر فين .. كل شيء على يدك

یا هانم یاختی .. مفیش حاجة خافیة علیکی .. حلفتك بالکعبة اللی طفتیها ما تخلی ملیم من فلوسی ما تصرفیهوش علی الطلعة الأبهة اللی تشرفنی .. عاوزه أموت موتة من قیمتی ولا یطلعنیش الکلاب اللی بیتقاتلوا علی مالی وبیعضوا فی لحمی بالحیا .. وصیتك أختك زنوبة .. مش عاوزه جتتی تترمی فی حفرة وتتغطی بالتراب .. لو طالوا فلوسی حا یعملوها والنبی یاختی .. حایقسموها بینهم ویستخسروا ملیم یاختی .. حایقسموها بینهم ویستخسروا ملیم فی یتیم یقرأ علی تربتی ..

زنوبة تربت على كتفها في حب ..

- یا حنینة یا هنومة .. یا طیبة یا هنومة ( تنهنه و تبکی علی کتفیها ) یا حبیبة العمر یا هنومة .. مایورنیش فیکی یوم وحش ابدا .. ما أشوفشی فیکی الیوم ده أبدا .. هنومة مازالت تنهنه ..
- وصيتك طلعتي ياختي .. ماتسيبنيشي لهم . - يا طيبة ياختي .. يا حنينة ياختي ( تعتدل فجأة في جلستها وتتكلم في جدية ) . ولا يكون عندك فكرة .. أنا مش ناسية حاجة .. أنا من

يومين مكلمة السمسار عشان يشوف لنا قيراطين في القرافة وعاطية له عربون .. وحياتك له نبني مدفن معتبر بحوش ومندرة وتركيبة رخام زى مدفن جدى الشيخ شناوى مكتوب عليه القرآن بمية الذهب .. مدفن أبهة يحكى الناس ويتحاكوا عليه .. تنظر إلى أختها في انتصار وهي تغمغم ..

- خسارة فيهم المليم اللى نسيبه ..
  - أى والنبى خسارة فيهم ..
  - زنوبة ترفع يديها إلى الساء ..
- بس لى طلب واحد يارب قبل ما أموت . نفسى أزور النبى وأتملى بنوره .. واحط إيدى على شباكه .. حجة وزيارة يارب ولا يكتر عليك .
- سوا والنبى سوا .. إيدى على إيدها يارب ..
- أصوات مشاحنة حادة تسمع من خارج المسرح .. زنو بة تتسمع ..
- يا ختى .. مين اللي بيزعقوا دول (تنادى): بت يا سكينة .. يا سكينة .. سكينة .. تدخل الخادم ..

- مين اللي بيتخانقوا عندك ؟
- سيدى الدكتور وسيدى مراد ..
- ينا ختى .. هم ما بيبطلوش خناق ..
  - مش مولودين فوق رأس بعض ..
- قطعوا .. وقطعت خلفتهم .. لو كنت أعرف اللى حاشوفه من وراهم كنت قعدت عليهم بططتهم ( ترفع صوتها منادية ) يا واد يا مراد .. يا واد يا أحمد .. وله يا كلب .. يدخل الكلب .. والكلب هذه المرة هو الدكتور أحمد .. رجل في الأربعين له وجه صريح صاف .. وهو يجر وراءه أخاه مراد .. وهما مازالا يتناقشان بحدة :
  - تعالوا يا غجر ..

تمد يدها لهم في طريقة آلية فيسارع الاثنان إلى طبع قبلة الطاعة عليها.

- احمد مساء الخير يا نينة ..
- مساء النور مالكو بتهبهبوا كده.
- مراد تصوری یا حاجة إنه عاوز یاخد منی خمسین جنیه تبرع علشان مشروع المستوصف الشعبی اللی حا یعمله لجل یداوی العیانین ببلاش .. تصوری الجهل .. هی تکیة ..

ملجأ .. وقف .. إنت فين يابني .. إنت نايم .. إنت نايم .. إنت في سنة ١٩٦٢ ، انتهى خلاص زمن التكايا والملاجئ .

- هو حرام يعنى الواحد يعمل حاجة لله .. ثم أنا مش حاعمل الكشف ببلاش .. أنا حاعمل كشف رخيص .. تذكرة بريال يخش بيها العيان يكشف ويتعالج .

- ها .. ها .. ها .. آل تذكرة بريال .. آل .. ده الحلاق اللى فارش فرشته على ناصية كوبرى الملك الصالح بيحلق القفا بريال .. يبقى كشف إيه اللى بريال .. ده ضرب الرمل بريال .

- طبعا .. واحد زيك سافف مال البلد بالاحتيال مش ممكن تقدر تفهم ازاى تبقى فيه ذمة في الدنيا ..

- ذمة إيه يا جدع انت .. انت عاوز تكدب عليه والا على نفسك .. الريال ده ازاى حا تقدم بيه خدمة طبية ممتازة للعيان .. حا تعمل له إيه .. حاتحسس عليه والا تكتب له رواند وصودا ..

- تأكد أن معظم الأدوية الغالية اللي بيشتريها

الأغنياء العبط اللى زيك بجنيهات .. ماتزيدش في تركيبها عن الرواند والصودا والسلامكة ومسحوق العرقسوس وبذر الخلة .

- بقى ده كلام دكتور مثقف متعلم .. بقه بالذمة مش خسارة فيك السبع سنين اللى تعلمتهم في كلية الطب .. بقه بالذمة إيه الفرق بينك وبين أمنا الحاجة .

زنوبة – ما لها الحاجة يا كلب ..

يسارع إلى تقبيل يدها كالمعتاد ..

-أمى وستى وعنيني وتاج رأسى ..

- تأكد إن العلاج أرخص بكتير مما تتصور .. قزازة ألبنسلين في الجملة سعره ٣ مليم .. قرص الفيتامين في الجملة سعره ٣ مليم .. الكينا والحديد أرخص من مواد العطارة .. استغلال التجار هو اللي خلق الرعب في الأسعار .. تأكد إن احنا يوم ما نعمل الكشف بريال والدوا بربع جنيه الكشف بريال والدوا بربع جنيه حانكسب شهرى مش أقل من ٩٠ جنيه غير ماهيتي اللي باخدها من ٩٠ جنيه غير ماهيتي اللي باخدها ما الحكومة . حايبقي إيرادي أكثر من ١٨٠

جنيه .. ما لهم ؟!

- وليه مايكونش إيرادتك ٢٠٠ جنيه .. وليه ما يكونش يكونش مايكونش عنيه .. وليه مايكونش عنيه .. وليه ما يكونش ألف .

- لأن الدنيا مش مكسب وبس.
  - ( في سخرية ) آه ..
- أنا مش فاهم ليه واحد زيك يبقى طماع ، عندك ١٠٠ فدان وماكينة حليج ووابور ميه وعندك كفايتك من كل شيء يبقى إيه لازمة الطمع .
- وأنا مش فاهم ليه واحد زيك مايكونش طماع .. مش بنى آدم زينا !! ؟ والا من أولياء الله .. والا ناوى تشتغل مبشر فى مستوصف الـ .. الشعب .. بتاعك ده عشان اللى ما يخفش بالحقن .. تغنى عليه بالكلام . والله يا أخى ما نافع فيك غنا .. ولا نافع فيك حقن .. بقالى ساعتين باشحت منك خسين جنيه تبرع لله .. للمرضى الغلابة .. اللى ما لهمش حد .. ساعتين بأحاول أحنن قلبك مفيش فايدة .. كأنى باكلم فى حيطة .. قلبك مفيش فايدة .. كأنى باكلم فى حيطة ..

إلا القوة .. القانون .. أما الذوق فهو مع أمثالك شحاته .. أسفخص على أمثالك ( يبصق مشمئزا ) .. أنا مش عاوز منك مليم .. تغور وتغور فلوسك .. أنا حاروح آخد تبرع من نينه .. من أمى الحاجة .. من حبيبتى .. وحياتى .. وروحى وقلبى .. يذهب إلى أمه فتنظر إليه شذرًا ..

الحاجة زنوبة - إيه الموشح ده كله كمان .. حبيبتى .. وحياتى .. وروحى .. وقلبى .. إيه .. عاوز إيه يا واد ..

- عاوز تبرع في مشروع المستوصف اللي حافتحه لعلاج الفقرا .

- هى سورة تبرعات يا وله .. دنا لسه دافعة قرش صاغ تبرع ( تنظر إلى أختها ) .. كان تبرع إيه يا هنومة اللى دفعنا فيه قرش .. آه ( تعصر مخها ) .. اللهم صلى عليك يا نبى .. كان .

جمعية رعاية السبيل ..

أيوه جمعية رعاية السبيل (تتلفت حولها) مين يا خويا السبيل ده ..

- أولاد سبيل إيه يا حاجة .. دى جمعية كلام

فارغ .. أنا مشروعي أنا حاجة تانية .. أنا حافتح مستوصف لعلاج المرضى الفقرا ..

زنوبة – المرضى الفقرا يا خويا لهم ربنا .. وانت مالك وما لهم ..

مالی ومالهم إزای یا حاجة أمال أنا دکتور
 إزای ..

- انت دكتور ميرى عليك القيمة ... مالك أنت ومال الفقرا .

- يا حاجة ماتقوليش كده .. ده إنتى مصلية وعارفة القرآن وربنا وصانا على الفقرا والمحتاجين ..

– ونعم كلام ربنا يا خويا ..

- طیب إیدك بقد علی خمسین جنید عشان نمشی علی كلام ربنا .

تخبط على صدرها ..

خسين إيه ؟! يا لهوى ( تنظر إلى اختها هنومه في فزع ثم تبدأ في النهنهة من جديد ) .. شايفة يا هنومة ولادى بيعملوا في إيه .. كل واحد بيخش لى على طمعه ( تنهنه ) يا عيني عليه وعلى بختى .. حتى ولادى .. ولادى .. ولادى .. ماليش بخت فيهم ( تنهنه ) وده بدال ما تمد ماليش بخت فيهم ( تنهنه ) وده بدال ما تمد

إيدك في خمسين جنيه تديهم لى .. وتقول لى .. خدى يامه دول عشانك .. وده بدال ما تأخد لى حقى من اللى بينهبونى ويسرقونى واللى ما تبطلش لهم قوله .. هاتى .. كمان تيجى أنت تقولى هاتى يامه ..

أحمد - يا حاجة إنتى محوشة .. ومستورة .. ومش مخلوق .. محتاجة لى ولا محتاجة لجنس مخلوق .. حاتودى فلوسك فين ..

- ( تنهند ) أنا محوشة عشان أزور النبى ياخويا واحط إيدى على شباكه .. وأتملى بنوره مش بخلقتكو العكرة .. محوشة عشان أقيم الفرض اللى ربنا فرضه عليه ..

- يا حاجة انتى حجيتى بدل الحجة سبع حجات وقمت بدل الفرض سبع فروض .. - اللى بيشوف الحبيب ما يشبعش منه يا خويا .. ده شوق ما يعرفوش إلا اللى شافه .. اللى زيك ما يعرفوش ..

- يا ستى الفلوس كتير والحمد لله .. يعنى خمسين جنيه حاينقصوا اللى تحت البلاطة .. - ( تبدأ في اللطم والعديد ) شايفه يا هنومة ياختى .. بيحسدوني على اللي معايا ..

ویعدوا علیه فلوسی .. عاوزین ینهبونی .. عاوزین ینهبونی .. عاوزین یسرقونی ( تبکی وتنهنه ) یا عینی علیکی یا زنوبة وع اللی جرالك .

هلینم – (تشخط فی أحمد ومراد) دهدی .. ما تنزاحوا من وشنا بقی .. هو احنا حانشیل همکم کبار وصغار .. مش کفایة الغلب اللی شفناه فی تربیتکم .

الحاجة زنوبة - مفيش وراهم إلا الخسارة .. اللي يطاوعهم يبيع اللي وراه واللي قدامه ..

هانم – وياريته يتمر .. إلا على رأى المثل .. إيد طويلة ولا حمد ولا جميلة

أحمد - يا حاجة .. إنتى لك مين في الدنيا غيرنا .. مش احنا ولادك وأحبابك .. وفرحتك هي فرحتنا .. وسعادتك هي سعادتنا .. ومصلحتك هي مصلحتنا

زنو بة - لا .. إبعاد عن المصلحة دى .. خلى المصلحة في حالها .. قال مصلحتي قال .. إسمعي ياهنومة إسمعي .. قال مصلحتي قال ..

هانم - يا خويا حل عنها بقى .. مشروع إيه اللى انت جاى تسرح بيه عليها .. وهى مالها ومال الفقرا .. ده ملك منظمه سيده .. اللى

بيريد له الفقر بيفتقر واللى بيريد له الغنى بيريد له الغنى بيغتنى .. وانت فاكر نفسك تقدر تشفى غلة ..

أحمد - طيب وديني يا حاجة هانم ماحديكي حقنة السكر النهاردة وخليكي كده .. قاعدة من غير أكل ولاشرب .. أما أشوف مين فينا حيقول .. الله حق ..

زنوبة – شوفى ياختى الواد الجاحد .. مستخسر الحقنة فى خالته .

انا مش مستخسر الحقنة في خالتي .. أنا عاوز أدى الحقنة لكل الناس اللي يحتاجوها .. عاوز أعالج كل الناس .. جريمة دى .. اجرمت في حق الإنسانية . ضجة عيال وتهريج وصفافير خارج المسرح تدخل چيچى « بنت مراد » امرأة في الثلاثين ممتلئة حيوية وأنوثة شعرها مصبوغ أحمر .. والبودرة والروج على الآخر .. والفستان محزق وشكلها ارتيست .. ومعها زوجها الأستاذ شفيق .. وأولادها ممدوح وإلهام وعادل يحملون تورته كبيرة فيها ٨٢ شمعة موقدة .. ووراءها الأستاذ السبكي

أحمد

المنتج والأستاذ لاشين المخرج .. والعمة العانس نفيسه .

والأولاد يغنون لجدتهم احتفالا بعيد ميلادها إلى ٨٢ والحفلة مفاجأة دبرتها چيچى .. مفاجأة للجميع حتى الجدة الحاجة زنوبة نفسها التى لا تذكر متى كان ميلادها .

صیاح .. صراخ .. تصفیر .. تهریج ..

هيه .. هيه .. هيه ..

اللي يحب جدته يقول .. هيه ..

هيه ( صواريخ وصفافير )

غناء ( چیچی تقود الکورس)

جدتنا الحاجة زنوبة

الحلوة الزينة الحبوبة.

مبروك ميلادك الليلة

تهانينا من كل العيلة

عقبال ألفين ألفين ليلة

هيه .. هيه .. هيه ..

اللي يحب جدته يقول .. هيه

هيه .. هيه (صواريخ وصفافير)

الأولاد يهجمون على جدتهم ويتسلقون أكتافها

ويوسعونها عناقًا وتقبيلا

يالله نطفى شموع جدتنا ننفخ فيها .. بقوتنا يارب خليها .. حبيبتنا ينفخون الشموع حتى تنطفئ الحاجة زنوبة تفتح ذراعيها لتستقبل حفيدتها چيچى في فرحة وتقبلها في كل مكان من وجهها وشعرها .

رنوبة – يا خدوجتى يا كتكوتتى يا قطتى الحلوة ..
ربنا يخليكى لى أنت ألف سنة .. ( تنظر إلى
ولديها أحمد ومراد فى غيظ ) ماجاتش منهم ..
ماجاتش من الرجالة الكبار المتعلمين اللى
بيحسبوا ويكتبوا ويعرفوا الواجب ( تعود
إلى تقبيل حفيدتها ) .. كفاية أنت لى .ف
الدنيا .. يا حلوة .. يا قطة .. يا چيچى ..
البنكنوت وتعطى ورقة بخمسة جنيهات لكل ولد
من أولاد چيچى .. فى فورة الفرح .
خدوا ياولاد .. افرحوا وغنوا .. وادعو
لجدتكم ..

- هيد .. هيد .. اللي يحب جدته يقول .. هيد ..
 - أحمد ومراد يصيحان .. هيد .. ويمدان يديها فتنظر

إليها الجدة في شماتة ..

- لا .. ده بعدكم

تخرج حزمة أخرى من البنكنوت وتعطيها لچيچى - دى عيديتك إنتى يا حبيبتى .. يا قطتى ..

يا فلتى ( تبدو من معاملة الحاجة زنوبة لچيچى أنها متيمة بها .. معجبة بجمالها وتبذلها .. ويبدو من نظراتها أنها تتذكر شبابها .. وأنها تتمنى لو أنها كانت بهذا التبذل .. ومهذه الحرية ) ..

مراد يهمس لأحمد على جانب المسرح

- ماقدرتش انت تطلع الفلوس دى بمشروعك بتاع مستوصف الشعب .. دلوقت طلعت الفلوس للست چيچى .. فاتنة الزمالك .. ( مقلدًا أمه ) لقطتى وفلتى ..

أحمد - ومين الراجل التخين اللي جاى معاها ده

- الأستاذ لاشين المخرج اللى اكتشفها .. اللى اكتشفها .. اللى اكتشف الوجه الجديد .. چيچى فاتنة الزمالك ..
  - والأصلع التاني ده مين
- ده الغنى المتيم المغرم .. الأستاذ السبكى المنتج اللى بيصرف على الاتنين ..
  - وجوزها الأستاذ شفيق راضى بكده

- أصل جوزها يبقى الأستاذ .. شفيق (يقوم بحركة مخنثة وهو ينطق الأستاذ شفيق بما يعنى أن الأستاذ شفيق بمخنث )
  - شيء لطيف

چیچی تقطع التورته .. وتعطی قطعة کبیرة للأستاذ السبکی وهی تبتسم وتبادله نظرة کلها غزل .. تصیح فجأة وهی تقطع قطعة أخری من التورتة وتضعها فی طبق ..

- جوزی حبیبی فین .. فین .. شفیق .. شفیق .. شفیق .. انت رحت شفیق .. یا شفیق .. انت رحت فید ..

زوجها الأستاذ شفيق يشق طريقه إلى طبق التورتة وسط الزحام

- أنا هوه يا حبيبتي

يأخذ منها الطبق وينهمك في الأكل.

الخاجة زنوبة في حالة نشوة بنفسها .. وهي قد نسيت تمامًا السبحة والسجادة .. وبدأت تتجول في فرح بين العيال كأنها طفلة مثلهم تقطع من تورتتها .. وتأكل .. وتغنى . وتدندن بصوتها .. الحاجة زنوبة - هيه .. هيه الحاجة زنوبة - هيه .. هيه ..

قولوا ياولاد معايا .. اللي يحب جدته يقول ايه ..

الاولاد - يقول هيه ..

تتذكر هنومه

- هنومتی .. تعالی یا هنومتی .. انتی فین تقطع قطعة کبیرة من التورتة لأختها وتناولها وهما تتعانقان چیچی تبحث بعینیها
- بابا .. أنا نسيتك انت فين .. ايه واقف لوخدك بعيد كده ليه مع عمى ..

مراد - بنتفرج

- بتتفرجوا على ايه ؟
- على الدنيا .. إننى حققت النهاردة نجاح ماحصلشى .. أنا أحسدك .. من يوم ورايح لازم تعلمينى ازاى بتعيشى فى الدنيا كذه إنتى مدهشة
  - أعلمك ؟!! .. العفو .. دنا تربية إيديك
    - أحمد أي والله تربية إيديه فعلا
- مراد إنما قوليلى إزاى عرفتى إن النهاردة عيد ميلادها .. إيه اللى فكرك ؟ ..
- چیچی (هامسة) عید میلاد إیه یا بابا .. سلامة عیلی میلاد .. عقلك .. هی جدتی لها ورقة میلاد .. ؟؟ ..

دى من سواقط القيد

مراد – الله أمال

يفتح فمه في دهشة ثم يضحك وقد اكتشف النكتة

- الله يجازيكى .. ويجازى شيطانك .. الله اخترعتى الحكاية دى كلها .. ؟؟ .. الله يجازيكى .. ها .. ها .. ها .. ها .. أحمد يضحك

چىچى تضحك

الثلاثة يضحكون معاً طويلا

مراد - والوليه المخرفة صدقت يستغرقون في الضحك من جديد

چیچی - حاعمل إیه .. الواحدة بتحتاج قرشین من وقت للتانی .... مصاریفی کترت یعلو صوت الأستاذ شفیق رفیعًا حادًا من أقصی رکن المسرح:

- تصوروا إحنا عمالين ناكل ونغنى وناسيين إن القيامة حاتقوم الليلة دى

السبكى - قيامة إيه .. إنت بتصدق تخاريف المنجمين المنود ... الهنود

- ده مش المنجمين الهنود بس .. ده كل

مراصد العالم قالت إن كواكب المجموعة الشمسية حاتترص صف واحد طوله ٥٠٠ مليون ميل

السبكى - طيب وإيه يعنى ما تترص يا أخى .. ما هى طول عمرها بتترص مرة بالطول ومرة بالعول ومرة بالعرض ومرة دايرة .. إيه يعنى

شفيق - لا يا سبكى بك .. دى حاجة بيقولولك إنها ما بتحصلش إلا مرة كل الف سنة

السبكى - العالم مؤجود من ألوف السنين ما قامش قيامته ليه مع أن الكواكب اترصت بدل المرة ألف مرة

شفيق - ما كل مرة تسلم الجرة

لاشين - لا والعجيبة إن المنجمين العبط صدقوا نفسهم وطلعوا فوق الجبال وطلع معاهم آلاف الهنود عشان يباتوا الليلة دى في الخلا

شفيق - طيب افرض أن القيامة قامت بصحيح لاشين - أعوذ بالله

چیچی - عمتی نفیسه تفرح أوی لو قامت القیامة . طول عمرها كانت بتقول لنا یارب تقوم قیامتكم یاولاد

نفيسه - ( تتكلم لأول مرة وهي عانس حول الأربعين ..

قبيحة .. في ملامحها حقد ومرارة ..) الناس كفروا .. والنسوان فجروا .. والعالم ضل .. لازم تقوم القيامة ويستقر أهل النار في النار .. وأهل الجنة في الجنة .. عشأن كل واحد يأخد جزاه ..

چیچی – وأنت من أهل الجنة والا من أهل النار یا عمتی

- أنا من الحتة اللي إنتي مش منها يا خديجة يا بنت أخويا

- طمنتيني الله يطمئك (ضحك) مراد هامسًا لأحمد على جانب. من المسرح: - مشركا شفنا لأختنا عرب عثمان تبطا

مش كنا شفنا لأختنا عريس عشان تبطل
 تدعى علينا بيوم القيامة .

- وإيه الفايدة .. لو كنا جوزناها كان جوزها دلوقت هو اللي بيتمنى تقوم القيامة .

- على رأيك

شفيق مازال يتكلم عن يوم القيامة .. وهو الآن قد أخرج صحيفة من جيبه .. وأخذ يقرأ فيها .. 
- تصوروا إن المرضى في الهند رفضوا إجراء العمليات الجيراجية انتظارًا ليوم القيامة .. والتلامذة بطلوا يروحوا المدارس

الحاجة زنوبة - إيه الكلام الفارغ اللى بتقوله ده .. قيامة إيه .. حد دخل علم الله .. وفين علامات .. الساعة مش لها علامات .. فين المسيخ الدجال

أحمد يشاور على مراد ثم يقوده من كتفه إلى منتصف المسرح .

- المسيخ الدجال أهوه .. أقدم لكم المسيخ الدجال . الأستاذ مراد الشوربجى .. راجل طيب جدا زى دودة القطن .. هو اللي بياكل قطن الفلاحين في بسيون كل سنة .

مراد - دودة القطن أحسن من دودة العلق الطبى اللي بتمص دم العيانين ريال بريال يا دكتور أحمد

أحمد - المسيخ الدجال مستعد لتوصيل السلف والرهونات والكمبيالات والحجوزات إلى المنازل .. حد منكم مش مديون للأستاذ مراد .. اللي مش مديون يرفع صباعه (لا أحد يرفع صباعه) شوف الجميع مدينين لك إزاى .. شوف خدماتك في كل مكان إزاى يا منقذ البشرية

چيچى - بابا مساهم في كل المشاريع الخيرية في

البلد .. بابا أكبر راجل خير في الدنيا .. أوعى تتكلم

أحمد - هو فعلا مساهم كبير .. له ألف سهم في الشركة العقارية وألفين سهم في شركة الزيوت وتلات آلاف سهم في شركة سيجورات وأربعة آلاف سهم في شركة سيلوس للتعدين .. حد يقدر يتكلم ..

مراد - مش أحسن من الأنفلونزا بتاعتك .. لو كل واحد كان من كبار المساهمين زيى .. ماكانش بقى في العالم مشاكل ولا أمراض

حمد - إزاى بقه .. ده مشكلة العالم سببها كبار المساهمين أمثالك .. العالم بيحارب بعضه عشان أمثالك

مراد - بالذمة يا إخواننا الراجل ده مش مجنون .. بالذمة مش لازم القيامة تقوم عشان تأدب المجانين اللي زي دول ..

شفيق يتذكر حكاية القيامة فيعود إلى التعليق بصوته الحاد الرفيع

- من حيث إن القيامة حاتقوم فهى فعلا حاتقوم . أنا ورئيس جمهورية بورما شخصيا متأكدين إنها حاتقوم الليلة ..

تصوروا إن رئيس جمهورية بورما أطلق سراح ٦٠٠ حيوان منهم ٣ خنازير و ١٥٠ حمامة و ٣٠٠ كابوريا و ٥٥ سمكة وقفل السلخانة تلات أيام عشان الآلهة تأجل يوم القيامة

ممدوح وإلهام وعادل أولاد شفيق يتراوح سنهم من ٩ إلى ١٣ يتصابحون في وقت واحد

إلهام – أنا خايفة يا بابا

ممدوح - بلاش سیرة القیامة دی .. السیرة دی بتخوفنی

عادل – یعنی إیه یا بابا القیامة ؟؟ .. یعنی کل الناس تموت .. ؟؟ یعنی احنا حانموت یا بابا .. یعنی مفیش بکره

أحمد - ماتخافش .. القيامة حاتقوم علينا احنا بس .. مش عليكم انتم يا كتاكيت .. إنتو لسه عندكو بكره .. وبعد بكره .. وبعد بعد بكره .. وبعد بكل بكره .. مش كده يا مراد بك

مراد - إنت راجل مجنون

أحمد – أيوه أنا راجل مجنون .. أنا عارف إنى راجل محنون .. وإنت كمان راجل ميت .. إنت ماشى على رجليك لكن ضميرك ميت ..

بص فی المرایة .. شوف شکلك محنط ازای ..

الحاجة زنوبة : خد فلوسى الراجل ده .. خد فلوسى ( تشاور على مراد )

أحمد - ميت خد من ميت .. حاتروح الفلوس فين .. ماتخافيش يا حاجة على فلوسك .. فلوسك حاتوصل لأصحابها ..

الحاجة زنوبة - (تنهنه) فلوسى .. ؟ فلوسى .. كل واحد بيجيى لى على طمعه .. كل ما أسلم على واحد أعد صوابعى .. كلهم بيسرقونى .. مش فاضل لى غير هنومة .. أختى الحنينة الحلوة .. الأصيلة ..

أحمد يقدم لها قطعة من التورته

کلی من تورتتك یا حاجة .. عشان تعیشی
 ألف سنة كمان وتشوفی ولاد ولاد ولادك ..

زنوبة – أنا عاوزه أزور النبى .. عاوزه أتملى بنور الحبيب . مش عاوزه أشوف خلقتك ولا خلقة ولادك .. ابعد عنى أنت وأخوك ..

چیچی - حاتاخدینی معاکی یا جدتی عند النبی

زنوبة - آخدك يا قطقوطتي .. يا خدوجتي

چیچی – أنا عاوزه أروح معاکی .. عشان أمثل ..

حامثل دور جاریة عربیة .. مش کده . یا أستاذ لاشین مش دوری فی الروایة جاریة عربیة

لأشين - لا مش جارية عربية .. جارية تركية في بلاط أمير فارسي

چیچی - (مبسوطة جدا تصفق بیدیها) .. الله و بعدین .. حایجصل إیه .. أحکیلهم علی الدور یا أستاد. لاشین

چيچى – حايحبك الأمير المليونير ويخطفك ويهرب بيكي لأوروبا

چیچی - (فرحانة جدا) .. الله ..

لاشين – وبعدين تتوهوا انتوا الاتنين .. وتقعوا في يد عصابة من قطاع الطرق في إيطاليا وتحصل معركة

چیچی – الله .. وینتصــر حبیبی عــلی رئیس العصابة .. ؟ !

لاشين – لا .. المنتج رأيه إن حبيبك يقع جريح عشان تبقى الرواية مثيرة أكثر .. ونعلق المتفرجين أكثر

چیچی - فکرة هایلة

المنتج يبتسم لها وينحني شاكرا في خجل وتواضع

لاشين - ورأى السبكى بك أن احنا نعمل تابلوهات رقص في إيطاليا .. ونعمل لقطة على البلاج .. لقطة فيها إغراء .. وسكس .. ودلع

چيچى - (تصفق) الله .. جنان

لأشين - وزوجة حبيبك تضبطك وانتى في أحضان جوزها وتهجم عليكي بضوافرها وأسنانها .. وتشد شعرك .. وانتى تهجمي عليها وتشديها من شعرها وتجرجريها على الحمام .. وتخنقيها

چیچی - أیاه .. روعة .. دی تبقی روایة ماحصلتش .. دی تکسب ملیون جنیه .. تکسب ملیون جنیه .. تکتسح السوق .. إیه الأفكار دی یا سبكی بك .. ماكنتش أتصور إنك مؤلف كبیر كده .

السبكى - ( فى تواضع جم ) الحقيقة أنا تعبت فيها كتير .. غيرت الكتاب الأصلى كله .. وعدلت فيه .. وألفته من جديد .. والعجيبة إن المؤلف بدل ما يشكرنى .. زعل منى ومسك فى خناقى .. إزاى اشوه اله ( فى سخرية ) اله .. الأدب الرفيع اللى كاتبه ..

چیچی - ده أنت عملت لها قفلة جنان .. جنان .. إیه رأیك یا عمی ..

أحمد - رأيى أنها جنان فعلا .. جنان إن رواية زى دى تطلع فى السينها .. وجنان إنها تكسب وعيادات الدكاترة جنبها بتخسر .. يبقى لازم القيامة تقوم فعلا .. يبقى العالم عايش بالمقلوب .

شفيق – أنا معاك .. بقينا تلاتة .. أنا وانت ورئيس جمهورية بورما .. مين معانا .. مين يقول إن القيامة حاتقوم الليلة دى .

ممدوح - يا بابا ماتخوفناش يا بابا ..

إلهام – أنا مش عاوزه أموت يا بابا .

عــادل – أنا خايف .. يا ماما .. القيامة حاتقوم . الحاجة زنوبة كانت نائمة أثناء الحديث وتيقظت على صراخ العيال

قامت قيامتك إنت وهوه .. هو حد دخل علم الله .. انتو بتصدقوا الرجالة المخرفين دول .

والنبى يارب ما تقوم القيامة قبل ما أمثل .. نفسى أبقى نجمة إغراء .. نفسى أبقى نجمة إغراء .. نفسى أبوظ على راكيل ولش .

نفيسة - ( وجهها يطفح مرارة أ.. رافعة يديها إلى الساء ) يارب طربقها بقى .. هدها .. خلى عاليها واطيها .. ساويها بالأرض .. يا قوى على كل ظالم .. عبيدك ظلموا . وكفروا .. ومكروا .. وفجروا . ومشيوا عريانين في الشوارع ..

صوت رعد يشق الصمت فجأة.

صراخ .. ورعب .. يغمى على الحاجة زنوبة .. ويبكى الأولاد وتصحو هنومة مذعبورة .. والأصوات التي تتردد في تلك اللحظة هي مزيج مختلط .

چیچی - یا دهوتی ..

هنومة – الحقوني ..

شفيق - القيامة قامت ..

هنومة – إيه ده ..

مهراد - یا ساتر یا رب ..

لاشين - أنا شفت السها بتبرق ..

السبكى - يا رب لطفك ..

أحمد - إيه بس يا جماعة دول شوية رعد .. هو .. يعود الصوت الراعد هذه المرة بشدة أكبر .. وتهتز النجفة تقع چيچى على الأرض وهي تصرخ .

- الحقوني ..
- شفيق القيامة قامت ..

يشتد الرعد .. ويبدو وميض البرق في النوافذ .. ويهتز المسرح هزات شديدة .

زنوبة تفتح عينيها من الإغماء.

- إيه اللي جرى ياولاد .. الدنيا بتتهز كده ليه ؟

يعود الرعد .. بشدة مرعبة .. ويهبط السقف في سقوط مخيف ولا يقع .. وإنما يظل معلقًا فوق الرءوس .. يتحول لون السهاء إلى حمرة الحريق .. ويبدو ضرام نيران على البعد .

مراد - البلد بتتحرق .. يا خبر إسود ..
المسرح فوضى .. وذعر .. وإغاء
رعدات وهزات أخرى شديدة .. وينطفئ النور من

المسرح ولا تعود تبدو إلا حمرة الحريق من النوافذ وضرام النيران على البعد ..

والأصوات تعود مختلطة في الظلام ..

يارب ..

يارب ..

يارب لطفك ..

تبت إليك ..

- أشهد أن لا إله إلا الله ..
- يا حي يا قيوم .. يا حي قيوم ..
  - ارحمنا يارب ..
  - الملك لك وحدك ..
    - يارب ..
  - يالله نطلع بره ..
- حانطلع فين .. ده فيه حريقة بره ..
- الولاد .. الولاد .. إنتو فين يا ولاد ..
  - حاموت ..
  - حاموت ..
    - .. آ -

صرخة حادة ..

أصوات كراسى تقع ومرآة تتحطم .. وأثاث يقع على الأرض .. أنين خافت .. وأثاث .. ( ستار )

## الفصهلالشاني

تزاح الستار عن المنظر السابق .. وقد تحول إلى أنقاض وخرائب .. السقف سقط ولكنه نجا من الانهيار بارتكازه على دعامات الأسمنت المسلح .. الحائط مشروخ ومائل على جنبه ولكنه لم يسقط تمامًا .. زجاج النافذة والشيش والضلف غير موجودة والنافذة متفسخة وتبدو على هيئة فراغ بين أخشاب منهارة ، وهو فراغ يطل على ساء حمراء متوهجة في الخلف . الأثاث ملقى على الأرض ومحطم .. المرآة مكسورة .. الريح تعوى في الخارج كأنها قطيع من الذئاب الجائعة .. عروق من الخشب تقطع المنظر بالطول وبالعرض .

هناك شمعدان موقد .. ترتعش شموعه .. وتلقى ضوءاً باهتاً مخيفًا على المسرح .. نفس الشخصيات في الفصل السابق كها تركناهم .. ولكنهم الآن بين ملقى على الأرض يئن وبين مغمى عليه وبين جالس يحملق في فزع وقد فتح فمه في ذهول .. وبين منكمش في ركن يرتجف من الهلع .. الأطفال مكومون في ركن وكل واحد منهم ممسك بالآخر .. ملابسهم جميعًا رثة وقذرة ومغبرة .

مراد ينظر حوله فى شرود .. ثيابه ممزقة وعيناه زائغتان يلتفت إلى الدكتور أحمد الذى يجلس بجواره كأنه لا يعرفه ثم يبدو فى عينيه كأنه يتذكره .

- إحنا فين .. إحنا فين .. إيه اللي جرى .. إحنا فين ( يصرخ فجأة في ارتياع ) إحنا فين ؟ !

يفيق باقى الأشخاص .. وتصدر عن كل منهم حركة تدل على أنه سمع الصرخة .. وأنه لا يفهم . أحمد ينظر حوله ويبدو عليه أنه يستجمع أفكاره ثم يقول فجأة :

- إحنا في الآخرة ..
- مراد آخرة إيه ؟؟ !! .. إنت اتجننت .
  - مش القيامة قامت ؟
    - قيامة إيه ؟
- تمام بالضبط زى ما المنجمين الهنود قالوا ..

الساعة عشرة مساء .. الدنيا اتطربقت باللي عليها ..

مراد يخبط جبهته وقد تذكر كل شيء ..

- لكن إحنا لسه عايشين .. وده بيتنا (يقوم وهو يتعثر ويتحسس الأثاث المحطم) وده الدولاب بتاع الحاجة .. ودى ساعة الحيط وده البوريه .. وده الشمعدان ، مين نور

- أنا إللي نورته لما الكهرباء اتقطعت.

الشمعدان ..

- والحاجة .. وبنتى (ينظر إلى چيچى) .. واختى (ينظر إلى نفيسة) .. واخنا كلنا .. نفر .. نفر (يتحسس كل واحد) .. مش معقول تكون القيامة قامت كنا متنا كلنا ..

أحمد – ما احنا متنا كلنا .. وبعثنا .. واحنا دلوقت أرواحنا اللي بتتكلم ..

منراد - مش ممكن .. احنا عايشين .. لسه على الدنيا .

أحمد - تعرف منين ؟

مــراد – إيه اللي اعرف منين .. إنت حاتجنني .. أنا

عایش (یقوم ویفرد نفسه ویخبط جسمه بیدیه) أنا عایش .. ده جسمی أهوه .. وده بیتنا .. ودی الدنیا ..

أحمد يضحك فجأة ضحكة هيستيرية ..

- هى دى الدنيا ؟ !! بص كده من الشباك .. شوف اللى أنت بتقول عليها الدنيا . يذهب مراد إلى الشباك وينظر في فراغه إلى الساء الحمراء المتوهجة ويضع يديه على عينيه في فزع .. ويعود مرتاعا ..

- أعوذ بالله .. السها لونها كده ليه .

- فیه جنس بنی آدم ؟؟ ! فیه جنس شـارع ؟؟ ! .. أو بیت .. أو غـیط .. أو مكان تعرفه .

- أعوذ بالله .. السها كلها ضباب أحمر .. مش قادر أشوف شبر قدامى .. والجو حر .. فظيع الدنيا كلها بتتحرق .

أحمد – دى مش الدنيا .. دى الآخرة .. إحنا فى النار .. عدة صرخات من النساء والأطفال فى وقت واحد .

أحمد - (مصرًّا على رأيه) احنا في النار.

مراد – إنت مجنون .. نار إيه .. احنا في الدنيا .. إيه

اللى حايجيب بيتنا فى النار .. إيه اللى حايجيب بيتنا فى الآخرة هو كمان (يلتقط بروازاً محطاً من الأرض) ودى صورة أبويا اهه .. الصورة اللى كانت متعلقة على الحيطة .. إيه رأيك فى الحكاية دى بقى ؟ يلتقط أحمد الصورة ويفكر ويهرش رأسه .. ويبدو عليه الشك .

أحمد - طيب لما احنا لسه في الدنيا يبقى إيه اللي حصل ده كله .. إيه اللي جرى .

مراد - القيامة قامت.

أحمد - والقيامة لما تقوم حاتبقى على حد ؟؟ !! ..

مراد - إرادة ربنا إنه يبقى علينا ـ

أحمد - ليه بقى ؟

مراد - عشان احنا ناس طيبين.

أحمد – ( يضحك ضحكاته الهيستيرية مرة أخرى ) ها .. ها .. ها .. ها .. ها .. ها .. ناس طيبين قوى .. ها .. ها .. ناس طيبين جدا .. أولياء .. هه ( يسحب أخاه مراد من كتفه ) أقدم لكم الشيخ مراد الشهوريجي ، حرامي .. ومرابي .. ونصاب .. وكذاب .. وأفاك هاتك حرمات .. زيارة مقامه صباح كل يوم ..

ومواعيد السواريه الساعة التاسعة والنصف .. ممنوع الدخول لأقل من ١٦ سنة .. بركاتك يا شيخ مراد ( يمصمص بفمه وهو يحرك يديه حول رأس مراد ) .. بقى القيامة تقوم وتبقى عليك .. دى القيامة تقوم بس عشان تاخد أمثالك ..

مراد – والله الواقع هو كده .. أنا عايش أهوه ملء السمع والبصر (يقف) أنا الوحيد اللي واقف على حيلى في الدنيا اللي اتطربقت كلها .

شفيق يتكلم الأول مرة:

شفیق - ماتستعجلش .. لسه ماجاش دورك .. المنجمین الهنود قالوا إن القیامة حا تأخد ۸۸ ساعة عشان تخلص علی كل الحیاة اللی فی الأرض .. لسه دورك جای .. ودورنا إحنا كمان .. كل شیء حایفنی .. كل شیء حاینتهی زی ماقالت النبوءة .

مراد - المهم دلوقت مش إن احنا نقعد نقول كمان ساعة حانفنى .. ساعة حانفنى .. المهم نشوف لنا طريقة .. المهم إن احنا عايشين في عايشين .. احنا الوحيدين اللي عايشين في

الدنيا .. تصوروا .. احنا الوحيدين اللي فاضلين على قيد الحياة .. احنا اللي ورثنا الكون كله .

أحمد – ( في سخرية ) بتموت وأنت بتفكر في الميراث .

الحاجة زنوبة تفتح عينيها من إغمائها الطويل وتتقلب على جنبها ثم تقوم وتقعد وتنظر حولها .. وتضع يدها على فمها وتتذكر .

زنو بة - طقم أسناني .. فين طقم أسناني ياولاد .. طقم أسناني راح فين .. طقم أسناني .

أحمد – ( ساخرًا ) طقم سنان إيه يا حاجة .. ؟!. اطلبی حاجة تستاهل .. إحنا دلوقت حانوزع الميراڻ .. ميراث الكون .

الحاجة - ( تتلفت حولها في ذهول ) إحنا فين .. البيت ماله مطربق على بعضه كده .. الشراعة مالها واقعة والدولاب واقع .. والسقف نازل ع الأرض كده والبيت أنقاض ( تخبط على صدرها وتصرخ ) يارحمن يارحيم .. استرها يارب .. أنا ف حلم والا ف علم ( تصرخ ) هنومة .. هنومة .

( يختنق صوتها ) الحقيني ياختي .. ( تنهار مكومة في مكانها ) .

أحمد يكلم مراد وهو يشاور له على طريق الباب .

أحمد – اتفضل يامراد بك عشان تستلم حصتك من الميراث مراد يقف في مكانه يحملق في الباب المفتوح يتمتم في ذهول.

مراد – العالم كله بتاعنا .. فدادين بالملايين .

أحمد - (ساخرًا), بس ياخسارة .. مين حا يزرع

مراد - ( فی نبرة من یفیق ) صحیح .. مفیش حد یجمع .. مفیش حد یجمع .. مفیش حد فلاحین .. مفیش حد یحسدنی .. مفیش حد حد الحالم خراب .

چیچی – ( نی صرخة هیستیریة ) لکن أنا عاوزه أروح باریس .

أحمد (ساخرًا) مش حاتلاقی حد یغازلك ولاعین تغمز لك .. مش حاتلاقی شبح بمشی وراكی .. حاتبقی لوحدك زی عفریت المآته فی غیط مفیش فیه حتی الغربان .

چیچی تصرخ وتغطی عینیها.

نفیسة – ( فجأة )روحبی · جهنم .. روحی النار ..

روحى الجحيم .. أنت دارك وقرارك الجحيم يافاجرة

چیچی – (تنظر إلیها فی غل) یاحسودة .. یاحقودة .. أنا عارفة إنك طول عمرك نفسك تبقی زیی ومش طایلة

نفيسة – اللى على رأسه بطحة أهو حاسس بيها چيچى – أنا عارفة البطحة اللى على راسى .. آدى البطحة اللى على راسى (تحل شعرها الجميل الطويل الدهب) شعرى الطويل الناعم الدهب ٢٤ قراط اللى ماحيلتيكيش منه شعرة واحدة .. ياقرعة .. يازعرة .. هى دى البطحة اللى غيظاكى

نفیسة - أنا أتغاظ من إیه .. بامصبوغة .. یامدهونة ده شعرك ده بیتباع طواقی منه فی الموسكی .. الطاقیة بخمسین قرش ده إنتی لو حطیتی رأسك تحت الحنفیة تبقی واحدة تانیة

ده إنتی مرسوم علیکی وش تانی .. ده الرجالة اللی بیجروا وراکی عمی

چیچی - عمی .. عمی .. فرحانة بهم .. عندکیش إنتی واحد أعمی یجری وراکی

نفيسة - ( في حقد ) بعد يومين أما تموتى شوفى خلقتك اللي حاياكلها الدود حاتبقى شكلها إيه ..

چیچی – یعنی أنتی لما حاتموتی حایعبوکی فی علب محفوظة .. ماإنتی کمان حایکلك الدود

نفيسة - الأطهارأحباب الله بيموتواوعلى وشهم النور.

چيچى - ليه .. بيبقوا معقمين .. ؟

أحمد - ( يدخل في الخناقة )أنا مع أختى نفيسه .. أنا اعتقد أني حاموت طاهر .. معقم .. ومفيش دودة حاتقرب مني .. لأن مفيش دلوقت ولا دودة ولاحشرة في الأرض .. الأرض كلها بقت معقمة .. كل الحياة ماتت من عليها ( في أسى ) ولو إن دى حاجة تزعل .. كان نفسى حد ينتفع بموتى ولو حتى دودة چيچى - اطمئن ياعمى .. الدود ماخلصشى من على

وش الدنيا .. لسه فيه (تشاور على عمتها) مش عجباك الدودة دى كلها .

. نفیسة – (تصرخ فی غل وهی ترفع یدیها للساء) یارب .. ورینی فیهم

مراد الذي يمشي نحو الباب المفتوح يتوقف فجأة .. وتتسع عيناه من الذعر .. ويتراجع وهو

يهتف:

- ياساتر يارب .. ياساتر يارب .. أعوذ بالله شفيق - فيه إيه .. مالك يامراد .. شفت إيه مراد - سكينة الخدامة ميتة ع الباب موسيقى تصويرية تصور الصدمة وجوم وذهول على الوجوه سكوت وقد خرست الألسن لحظة مراد واقف يغطى عينيه بيديه الحاجة هنومة تصحو من إغمائها .. وتنظر متفحصة الوجوه والمكان .

الحاجة هنومة - أنا فين .. إيه اللي جابني هنا .. وفين زنوبة أختى .. إيه اللي نومها قبل ماتصلي العشا .. زنوبة .. زنوبة .. إصحى يازنوبة .. ولاد .. النور واطى كده ليه ياولاد .. ومولعين الشمعدان ليه .. هي الكهرباء راحت .. هي الشركة دايما كده شغلها. بايظ ( تنظر حولها يتمعن أكثر ) ياختى .. أعوذ بالله من الشيطان الرجيم .. إيه ده .. الدولاب إيه اللي وقعه .. والشباك مخلوع كده ليه .. والدنيا مالها حالها مقلوب كده .. بسم الله الرحمن الرحيم هو جرى إيه ؟

هنومة – ( تبصق في عبها ) بسم الله الرحمن الرحيم .. يارب احفظنا .. قيامة إيه ياخويا .. السماح والرضا يا أسيادى .. السماح والرضا يا أسيادى .. انصر في ياروح .. انصر في ياروح .. انا في حلم والا في علم .. هم حايلبسوني تاني ؟

أحمد – هم مين اللي حايلبسوكي تاني ياخالتي ؟ هنومة – إخواننا اللي م الأرض يابني .. ربنا يحفظك ويصونك منهم .

أحمد – مفيش حد من الأرض لابسك .. إنت في عقلك وفي وعيك واللي أنت شايفاه ده يوم القيامة .

هنومة – يوه .. اللهم اخزيك ياشيطان .. هو أنا كل ما أروق حاتعكر تانى .. كله من الوليه الكودية اللى بت عندها ديك الليلة .. أصل ريحها بيجيبهم .. أما أقوم أجيب البخور .. أتبخر وأحرق حبة مستكة أطرد بيها الأرواح الوحشة دى

تقوم وتمشى كأنها تمشى فى نومها .. وتتجه إلى باب مغلق فى أقصى الصالة ..

أحمد - إنتي رايحة فين ياخالتي ؟

هنومة - حاروح أجيب حبة بخور من المطبخ أحمد - ياخالتي تعالى مفيش عندك بخور .. ولافيه مطبخ

هنومة تختفي في الظلام وتذوب خطواتها ..

أحمد - الوليه راحت فين ؟

أصوات وقوع أشياء في المطبخ ..

( كلمات هنومة تأتى من الداخل ) يختى هو زر النور فين هو مفيش نور ولا إيه .. أحمد يرفع صوته ليصل إلى أذنيها ..

- ياخالتي مفيش نور في البيت كله . تعود هنومة وفي يدها شمعدان آخر وعلبة كبريت .. تشعل الشمعدان .. وتنظر في الصالة التي بدأت تتضح لها أكثر .. تمسك الشمعدان وتقربه من الوجوه واحدًا واحدًا .. وهي تمصمص شفتها :

- مال وشوشكم زى وشوش الميتين كده .. مالكو صفر وبترتعشوا .. هو فيه إيه .. جرى إيه .. بسم الله الرحمن الرحيم .. جتنى بتتنفض .. أما أروح أجيب البخور قبل ما أنسى .

تعود في اتجاه الباب حاملة الشمعدان في يدها ..

أحمد - ياخالتي تعالى رايحة فين؟

هنومة - اسكت ياوله بلأش دوشة .. خالتى .. خالتى .. خالتى .. وهو أنت فى بقك عفريت اسمه خالتى .

تدخل من الباب وتختفى في الظلام .. تعوى الرياح وتعول موت حزين مفجع .

أحمد - ( في بأس ) دى الولية دى مش دارية بحاجة .. دى في عالم تانى خالص .. الأطفال يمسكون ببعض ويرتجفون .. تعود الرياح فتعوى كأنها ملايين الذئاب الجريحة .

ممدوح – أنا خايف يا بابا

إلهام – أنا حاموت.

عادل - الحقني يابابا تعالى خدني .

أبوهم نفسه يرتجف من الذعر .. أمهم تفكر في مسائل أخرى مختلفة .'

أحمد - تعالوا عندى ياولاد .. تعالوا ماتخافوش ..
( يذهب إليهم ويحوطهم بذراعيه ويدخلهم في صدره ) تعالوا معايا .. أنتو حبايبي ..
ماتخافوش .. مش حايجرى لكو حاجة خليكم جنبي ( يأخذهم إلى جواره ) اقعد يا محدوح ( يضع له كرسيا بجواره ولكن الكرسي لايقف على الأرض ويظل يتأرجح كأن به

رجلا قصيرة وأخرى طويلة) الكرسي مش عاوز يستقر في مكانه ليه ؟ (يتفحص الكرسي ويتفحض الأرض ) إيه البلاطة العالية دى ( يتحسسها ) دى البلاطة بتطلع ( يرفع البلاطة ) يا خبر إيه ده ( يرفع من تحت البلاطة رزمة من الأوراق المالية) إيه دى .. فلوس (يفض الأوراق) دى كلها أوراق بعشرة جنيه .. ميه .. ميتين .. تلتمائة .. ربعماية .. خمسماية .. ألف إيه دول .. دول فوق خمس آلاف خنيه (يضحك) فلوس أمنا الحاجة اللي تحت البلاطة خمسة آلاف جنيه ياحاجة .. حاتعملى بيهم إيه (يضحك) مدفن بحوش وتركيبة رخام منقوشة بمية الدهب ( ينظر إليها وهي ممددة قليلة الحيلة فاقدة النطق ) وشادر .. وصوان .. وجنازة قدامها العسكر صفين .. شايفة ازاى أنا فاكر طلباتك ياحاجة مش ناسى ولاطلب ( يهزرزم الورق في يده ) خمسة آلاف جنيه ياحاجة .. عاوزة تبنى هرم رابع تنامى فيه ياحاجة حتشبسوت ۱ (یضحك) وحاتعملی إیه بالتركيبة الرخام المنقوشة بمية الدهب.

عشان الناس يقولوا (بصوت تمثيلى) هنا ترقد الحاجة زنوبة شناوى سليلة المجد والكرم. بذمتك حاتسمعى حاجة من الكلام ده (يناديها) ده انت مش سمعانى من دلوقت .. (يناديها) ياحاجة (يهزها) ياحاجة .

الأولاد يتحلقون حوله ويتفرجون عليه بفضول .. وطول الوقت كانوا يتتبعون حكاية الفلوس التي وجدها تحت البلاطة بشوق متزايد .. وهم الآن يحاولون مساعدته ..

ممدوح – نرش علی وشها میه ..

إلهام - نزعق لها في ودنها ..

عادل - نشممها نشادر ..

أحمد - نشممها فلوس أحسن ( ينظر إلى رزم الفلوس في يده ) .. خمسة آلاف جنيه .. ورق بعشرات .. كل ورقة تنطح التانية .. ( يفك الرزم ويفر الأوراق ثم يبدأ في إلقاء الأوراق في الهواء .. ورقة .. يقذف بها إلى أعلى السقف وهو يعد ) عشرة .. عشرين .. تلاتين .. أربعين .. خمسين .. ستين ..

تمانین .. تسعین .. میه .. میة وعشرة .. میه وعشرین ..

الأولاد يتنافسون في التقاط الأياق من الهواء ويجرون خلفها في كل مكان.

چيچى - (تصرخ في وجهه) إيه إنت اتجننت .. بترمي الفلوس في الأرض ..

- دول مش فلوس .. دول كانوا فلوس لما كان فيه في الدنيا ناس بتبيع وتشترى .. إنما دلوقت بقوا مايساووش حاجة .. حاتديهم لمين .. وعشان نشترى بيهم إيه .. وليه .. ما الدنيا كلها بتاعتك .. انزلى خدى منها اللي انتى عاوزاه ( يعود إلى بعثرة الأوراق في الهواء ) ميه وتلاتين .. ميه وأربعين .. ميه وخسين .. ميه وسبعين .. ميه ومانين .. ميه وسبعين .. ميه ومانين .. ميه وتسعين .. ميتين ( ينظر إلى چيچى ) دول دلوقت بقو زى ورق الجرايد .. ورق التواليت .. ( يعود إلى البعثرة ) ميتين وعشرة .. ميتين وعشرين ..

جيجي - إنت اتجننت ..

أحمد

أحمد - بالعكس .. أنا عقلت جدا .. وشفت كل

حاجة على حقيقتها (يصرخ) اللى حايعيش دلوقت مش اللى معاه فلوس .. اللى حايعيش عاييش هو اللى حايقدر يشتغل .. هو اللى حايعرف يزرع ..

چیچی - (تصرخ) لکن أنا ما أعرفش أزرع ..

أحمد – على كيفك .. جوعى .. موتى ..

چیچی – ( فی حرکة إغراء ) أنا ممثلة کبیرة .. أنا نجمة إغراء .. إزاى أشتغل وأزرع ..

أحمد - ممثلة إغراء ؟!! تشرفنا .. حاتمثلى على مين . بعد شهر ياممثلة الإغراء لو كان لنا عمر .. حاتكون هدومك دابت وكلتها العتة وحاتكون بقيتى عريانة ملط .. وحانكون زهقنا من الإغراء .. بتاع سيادتك ..

چیچی – انت فظیع .. ایه الکلام اللی بتقوله ده .. سوفاج .. سوفاج ( تبکی ) .

أستاذ لاشين أتكلم .. قول حاجة .. قول إن الكلام .. تثيل .. قول كلاكيت (تصفق بيديها) عشان اعرف إنها لقطة في رواية .. وإنها مش حقيقة .. أنا حاموت .. حاموت .. مش معقول .

لاشين - بسيطة .. غالية والطلب رخيص (يصفق بيديه) .. كلاكيت .. استريحتي ..

چيچى - غيروا المنظر بقى .. انتهت اللقطة (تتلفت حولها) فين الفراشين .

أحمد

مفيش فراشين ... أقوم أنا أغير المنظر يقوم . من مكانه ويذهب إلى الستارة المسدلة في ركن ` ويفتحها فيبدو من ورائها الحطام والحائط المشقوق والثغرة الواسعة التي تطل على السهاء الحمراء المتوهجة المرعبة .. وتعوى الرياح معولة كأنها آلاف الذئاب الجائعة) يعجبك المنظر ده والانغيره كمان .. كلاكيت ( يصفق بيديه أمام باب المطبخ الذى أغلقته الحاجة هنومة خلفها فينهار الباب تماما ويسقط وتسقط عليه الحاجة هنومة جثة هامدة متخشبة وفي يدها شمعدان .. صراخ حاد . ورعب .. ويتجمع الأشخاص حول الجسد المتخشب ويمد أحمد يديه فيرفع الجثة وينظر في العينين الزجاجيتين ثم يحملها على ذراعيه ويدخل بها المطبخ ويختفى لحظة ثم يعود وفي يده الشمعدان .. يحتال حتى يغلق الباب المكسور ويعيده إلى مكانه ليحجب منظر الميتة بالداخل .. يصفق بيديه) كلاكيت .. إيه رأيك .. نغير

المنظر تانى ؟؟ ( يبدأ فى إشعال الشمعدان ) .. چيچى - إنت مجنون .. إنت مجرم ( تبكى وتصرخ ) .. تصحو الحاجة زنوبة على الصراخ والعويل ترفع رأسها وتتلفت فى الموجودين ..

- إيه يا أولاد فيه إيه .. مالكو .. جرى إيه .. أنا كنت نايمه وإلا إيه .. هي الساعة كام دلوقت .. هي العشا ادنت .. فين السجادة . ( تنظر تحت رجليها وتكتشف البلاطة المخلوعة .. تهجم عليها وهي تصرخ ) مين اللي شال البلاطة دى .. فين الفلوس اللي تحتها .. فلوسى .. فلوسى ( تلطم ) فلوسى .

- (یسارع برزم الأوراق لیضعها فی حجرها). أهم .. أهم یاحاجة ماتخافیش .. عدیهم خسمائة ورقة بعشرة . (یبدأ فی جمع الأوراق من علی الأرض وتكویها فی حجر العجوز المذهولة التی تنفجر بین لحظة وأخری فی نوبة من الصراخ). فلوسی .. فلوسی .. فلوسی . (ثم ماتلبث أن تفقد وعیها من جدید الأولاد المرعوبون یتكومون حول الدكتور أحمد ویتعلقون بثیابه)

لاشين – دلوقت أنا عاوز أفهم إيه آخرة ده كله .. لازم نشوف لنا حل .. يلتقط الموجودون هذه الكلمة كأنها طوق نجاة .. وتسرى همهمة ويعتدل كل واحد في مكانه ويسح دموعه ويستعد الجميع لمواجهة الموقف بواقعية أكثر ..

مراد – ( وقد بدأ يفيق من صدمته ويتلفت حوله ) حانعمل إيه يعنى ..

لاشين - احنا دلوقت مسجونين في خرابة بقى لنا خس ساعاد وكمان شوية حاتواجهنا مشكلة إن حنا لازم ناكل ونشرب ونعيش .. ومير يعرف يكن يكون مكتوب لنا عمر في النايا ..

مراد - حانعمل إيه يا ..

لاشين – لازم ندور على لى .. لازم ندور على أكل ..

مراد – انزل دور ..

لاشين – (يتنحنح في حر وكأنه وقع في مصيدة) نشوف في المطبخ الأ , يمكن يكون فيه أكل .

مراد – اتفضل المطبخ عموه .. من هنا .. ( يشاور له يلاد على الموكة ) يلبث لاشين في مكانه لايجرؤ على الحركة )

السبكى - ( في نبرة أرستقر لية ) نادوا على الخدام .. وله

يا خدام ( لا أحد يرد .. يتلفت حوله في تساؤل ) .

أحمد - مفيش هنا خدامين .. سكينة الخدامة الله يرجمها (ساخرا) ممكن تنادى عليها من الآخرة إذا كنت تقدر .

السبكى على وشك أن ينادى عليها من الآخرة ولكنه يرتبك ويسكت.

لاشين - (يتذكر شيئًا) السواق كان معايا في العربية .. فكرة .. ننادى على السواق هو اللي يحل لنا المشكل .

أحمد - اتفضل نادى ع السواق ..

لاشين – (يبحث عن باب الخروج) هو السلم فين ..

أحمد - مفيش سلم

لاشين – مفيش سلم إزاى ..

أحمد - السلم اتطربق .. احنا متعلقين ..

لاشين – ( في بلاهة ) طيب . أ . أ . أو الأسانسير

أحمد - الأسانسير ..!!؟ (يضحك ولا يجيب).

لاشين - طيب وبعدين .. أجيب عثمان منين ..

السبكى - إزعق عليه م الشباك ..

يذهب ناحية النافذة ثم يرتد مسرعًا ..

لاشين – ياساتر .. الحر فظيع .. فظيع .. الهوا كأنه نار ..

السبكى - ازعق عليه من هنا .. ازعق عليه قوى .. يكن يسمع ..

لاشين – (في سذاجة) .. ياعثمان (يرفع صوته أكثر) .. أكثر) .. ياعثمان (يرفع صوته أكثر) .. ياعثمان (يتردد صدى الصوت عدة مرات بين ياعثمان (يتردد صدى الصوت عدة مرات بين الخرائب ثم يعود الصمت) .

أحمد - عثمان مين .. إنت بتنادى على مين ..

لاشين - السواق بتاعى ..

أحمد - سواق إيه ياراجل يامجنون ..

لاشين - سواق العربية ..

أحمد – هو فيه عربية عشان يبقى فيه سواق .. ده مفيش حاجة خالص .. مش حاتشوف إيدك إذا كانت أبعد من نص متر من عينك ..

السبكى - شيء فظيع ..

أحمد - كل الدنيا ملفوفة في غبار أحمر مغطى على كل شيء ..

لاشين - ياساتر ..

السبكى - طيب والعمل إيه ..

شفيق - أنا رأيي إن احنا نصلي كلنا ونبتهل لربنا إنه

ينجينا من البلوى دى ..

أحمد – وتفتكر إن ربنا يلتفت لصلاتك المغرضة دى بذمتك صليت كام ركعة في حياتك .

شفيق - الا ركعة ..

أحمد – عنى حاتبقى دى أول ركعة تركعها . يبقى بينى وبينك حاتبقى مكشوفة أوى .. الوقت راح يا شفيق ياخويا .. كان زمان ..

شفيق - ربنا غفور رحيم ..

السبكى - وشديد العقاب

نفیسة – (نی مرارة) جه یـومکم یا فجـار ..
یا فساق .. وربنا حایورینی فیکم ..

الاشين - (هامسا) الولية دى مفيش حد حايخلصنا من حقدها ..

أحمد – اعتبرها فيلم .. اعتبرها رواية .. اعتبرها لقطة .. وبعدين كلاكيت (يصفق بيديه) غير المنظر ..

السبكى - ( في غضب ) إيه الكلام الفارغ ده .. ده وقت الضحك والهزا .. إحنا في إيه والا في إيه .. ابتو قاعدين ننكتوا والدنيا بتطربق ..

أحمد - حانعمل إيه ياسبكى بك .. يعنى لو عيطنا لاحا نأخر ولانقدم في قيامة القيامة .. السبكى - بس الموقف اللي احنا فيه يستلزم ..

أحمد - يستلزم إيه ياسبكى بك .. تعرف إنجلترا منحت نيشان الشجاعة في الحرب اللي فاتت لمين .. لا أبدًا .. مش للمارشال مونتجومرى .. منحته للكباريه الوحيد اللي استمر فاتح يقول نكت ومنولوجات طوال شهور ضرب لندن بالقنابل .

السبكى - يعنى قصدك إيه ..

أحمد - يعنى الحل الوحيد اللى فاضل لنا إن احنا نقعد نقول نكت في الساعات اللي باقية على نهاية العالم .. ده الشرف الوحيد اللي فاضل لنا .. إن احنا نضحك بالرغم من كل

السبكي - إنت بتهزر ..

أحمد - أبدًا .. أنا بتكلم جد .. ومنتهى الجد .. وأنا شخصيا حابداً فاصل الضحك (يضحك .. ولكنهم تبدو ضحكته الهيستيرية جوفاء رهيبة .. ولكنهم مايلبثون أن يضحكوا عليه .. وينتقل الضحك من وجه إلى وجه .. ثم يعود الصمت فجأة ثقيلا مرعبًا).

السبكى - إنت لازم اتجننت .. أخوك مراد له حق في

كلامه .. إنت مجنون فعلا .

مراد – طول عمرى بقول إنه مجنون .. السبكى – أنا عاوز أفهم أنت بتضحك على إيه

دلوقت ..

- بضحك على نفسى .. لأنى عشت طول عمرى أفرح وأزعل وأغضب وأثور وأتجنن والآخر بموت وأنا مش فاهم حاجة .. مش فاهم ليه كنت باتشنج كده وعلى إيه .. كله حايبقى بسوا الأرض كمان يوم ولا اتنين .. كان إيه لازمه الزعل ده كله .. أما أنا كنت مغفل .. ( يضحك ) ومش عاوزيني أضحك كمان .. ده شيء مضحك .. ده شيء يجنن من الضحك ( يضحك بشدة .. حتى تتحول منكم يفهمني إيه الحكاية ..

لاشين – يغنى فجأة ويلوح بيديه فى حركات مسرحية .. الحكاية إن حبك ياحبيبى .. نار

لهيب من غير شرار ..

خلى برج في عقلي طار ..

يسكت فجأة ثم ينظر إلى الوجوه المتطلعة ..

لاشين - دى حته من أوبريت في الرواية الجديدة اللي

أحمد

بتخرجها وبتمثلها چیچی .. غنی معایا یاچیچی .

( يعود إلى الغناء وقد اندمج تمامًا في دوره ) .. الحكاية إن حبك ياحبيبي .. نار

لهيب من غير شرار ..

خلى برج في عقلي طار ..

چيچى - قلبك إيه

ده أوده مليانه كرار

فيه زبالة من حريم من كل دار ..

فيه عبيد وجوار ..

كبار وصغار ..

أنا فين جوه قلبك ..

فين مكاني .. أ

( لاشين يركع على قدميه ويرفع يديه متوسلا إليها .. من الواضح انه اندمج فى دوره تمامًا ونسى الناس حوله ) ..

- إنت في كل مكان في الهوا اللي بتنفسه .. في الميه اللي بشريها .. في قلبي .. حواليه .. في منامي .. في أحلامي .. في خيالي ..

چیچی - (مندمجة تماما فی دورها ومنفعلة بكل كلمة) اقتل کیا مندمجة تماما فی دورها ومنفعلة بكل كلمة) اقتل کل الحریم بتوعك لو کنت بتحبنی .. واقتل

نفسك كمان .. أنا غايره من نفسك .. مش طايقة أشوفك بتحب نفسك أكثر ما بتحبني ..

لاشين - أقتل نفسى ؟؟ أقتل نفسى إزاى .. طيب وأحبك بإيه .. ده أنا بحبك بنفسى .. بروحى ..

چیچی - لازم تموت فی حبی ..

لاشين - ولما أموت حايفضل مني إيه ..

چيچى - حا يفضل حبك ..

لاشین – حبی حایوت معایا .. ارحمینی خلینی أعیش عشانك .

چیچی - لا .. مش عاوزه .. عاوزاك تموت عشانی .. تموت فی حبی وأعیش طول عمری أبكی علیك وأدور علیك .. عاوزة أعیش فی الحزن علیك .. مش باصدق حاجة فی الدنیا إلا علیك .. مش باصدق حاجة فی الدنیا إلا الدموع .. الدموع .. ( تبكی بحرقة وقد نسیت نفسها تمامًا ) ..

أحمد - (يصرخ فجأة) أنا اكتشفت الحل .. أنا لقيت الحل اللي فيه مخرجنا جميعًا ..

مراد - إيه ده ياراجل يامجنون ..

أحمد – ( يروح ويجيء بعرض المسرح وطوله في انفعال )
وجدتها .. وجدتها .. أوريكا كما
قال أرشميدس .. خلاص مش مهم تتطربق
الدنيا .. تتطربق مش مهم .. خليها
تتطربق .. أنا وجدت الحل .. وجدت
الخلاص ..

لاشين - إيه .. نسافر للمريخ ..!!

أحمد

أحمد - مريخ إيه ياراجل ياعبيط ..

لاشين - امال نروح فين .. قول لى الحقني

- (یشاور علی قلبه) نروح هنا جوه .. نغطس جوه فی نفوسنا .. فی قلوبنا .. کل واحد یغرق فی روایته الخاصة زی ماأنت دخلت فی روایتك واند مجت فیها ونسیت کل حاجة .. کل واحد یعیش فی وهمه .. کل واحد یبنی له دنیا .. روایة یعیش فیها .. ویقفل مسرحها علیه .. والدخول بتذاکر .. یدخل اللی

يحبهم بس .. والباقى بره .

مراد - طیب وها تودی البراکین دی فین .. ها تودی الکوارث دی فین (یشاور علی الساء اللی تبدو حمراء متوهجة من النافذة)

أحمد - بره .. كله بره .. حاعيش طول عمرى

موهوم .. متهيألى .. ماأشـوفشى غير أوهامى .

صوت رعد .. يعقبه زلزال شديد يهز ديكور المسرح .. يترنح أحمد في وقفته ..

مراد - وتودى الزلزال ده فين ..

آحمد – بره .. کله بره ..

مراد – لكن انت مش قادر أهوه .. انت عمال بتتهز حاتقع .. ( أحمد يترنح ) .

السبكى - هو ده الحل يا أحمد ..

أحمد - ده حل اللى ماعندوش حل ( يغطى وجهه بيديه ويبكى بشدة ) ده حل اللى ماعندوش حل .. أنا تعبت .. أنا مش عارف إيه آخرة ده كله أنا مش عارف أروح فين . حد منكم يقدر ياخد بيدى .. حد منكم يقدر يورينى السكة ( يمد يده .. تظل يده معلقة في الهواء .. ولايتقدم أحد ) مفيش حد عارف السكة .. الزلزال مازال يهز ديكور المسرح ..

أحمد - مفيش حد عارف الحقيقة .. يبقى أعيش فى الوهم أحسن .. حتى الوهم مش لاقيه .. مفيش حد بيهنينى عليه .. كل ما أخلق لنفسى وهم ألاقى اللى يصحينى منه ويقول

لى اصحى .. اصحى .. أنت موهوم .. وأنت مالك يا أخى .. ماتسيبنى فى حالى .. لا ازاى .. إصحى .. اصحى .. انت موهوم .. طيب قين الحقيقة هى فين الحقيقة .. مفيش حقيقة .. أنا تعبت .. عاوز أحلم .. أحلم .. حلم طويل ماأصحاش منه .

ینهار ویضطجع علی حائط مائل فی رکن ویغلق عینیه

- غنی لی یا چیچی .. غنی غنوة تخلینی أنسی کل حاجة .. وانساکی کمان .. وأنسی نفسی .. وأنسی إنك بتغنی ..

چیچی \_ ( فی رقة ) یاحبیبی یاعمی ( تأخذ رأسه بین راحتیها وتمسح علی شعره وجبینه ) ..

أحمد - (یفرك عینیه ریفتحها متعبًا) أنا باكذب علی نفسی .. أنا عمری ماقدرت أنسی حاجة أبدًا . عمری ماقدرت آخذ إجازة من عقلی أبدًا . عمری ماقدرت أغمض عینی .. أبدًا . عمری ماقدرت أنام .

إلهام - أنا خايفة ..

أحمد – (يفتح ذراعيه) تعالوا ياولاد في حضني .. يهرع الأولاد إليه .. عمرع الأولاد إليه .. أحمد – امسكوا في .. كل واحد يمسك في التاني .

( ستار )

## القصلالثالث

نفس منظر الفصل السابق بالإضافة إلى انهيار الحائط الأين ليكشف عن قطاع في غرفة مجاورة .. طوب وأخشاب وكتل من جبس السقف في أماكن مختلفة من المسرح .. نفس أشخاص الفصل السابق ولكن ثيابهم أصبحت الآن أكثر رثاثة .. ووجوههم أكثر صفرة . وكل منهم قد استلقى متعبا في مكان .. بعضهم ارتمى على ظهره ومضى يحملق في السقف في بلاهة .. والآخرون لاذوا بالأركان .. وأسندوا ظهورهم إلى الحائط ..

والحاجة زنوبة تتحرك ببطء وتفتح عينيها وتتكلم لصوت متحشرج ..

– ریقی ناشف .. عاوزه اشرب ..

أحمد - ( يهز زجاجة في يده ويقلبها ليؤكد للجميع أنها

فارغة ) القزازة خلصت ياحاجة .. اصبرى اصبرى وأمرك لله ..

- أنا جعانة ..

شفيق - حاتكلى إزاى وإنتى عطشانة .. تعطشى أكتر بعدين .. ومفيش عندنا غير رغيف ناشف .

أحمد - (يلوح برغيف في يده) الرغيف الأخير ..

الحاجة زنوبة: اديني لقمة.

أخمد - ( يقطع لها لقمة ناشفة ويناولها ) خدى .. ذنبك على جنبك ..

تضع اللقمة في فمها وماتلبث أن تكتشف أن طقم أسنانها ضائع فتبدأ في لطم خديها في عصبية .

الخاجة زنوبة: طقم أسناني .. طقم أسناني فين ..

- أحمد - أهو ده بقى اللى مانقدرش عليه ..

\_الجاجة زنوبة : طقم أسنانى ( تلطم ) طقم أسنانى .. هاكل بايد من غير طقم أسنانى .. ( تبحث حولها ) طقم أسنانى .. ( طقم أسنانى ..

أحمد – حطى اللقمة في بقك كده شوية وهي تبوش

زنوبة – ريقي ٰ ناشف ..

- واحنا حانعمل إيه ياحاجة .. احنا ذنبنا إيه .. احنا اللي قومنا القيامة ؟؟ .

- نفسی فی شربة میه تبل ریقی ..

- یا سکینة .. یاهنومة .. یاسکینة ( تتلفت حولها ) .. یاهنومة ..
- مش حایسمعوکی .. أصلهم بعید أوی ..
  - بعيد فين ..
  - في آخر الدنيا ..
  - وإيه اللي وداهم آخر الدنيا ..
- (يلوح بيده) راحوا يتمشوا في الطراوة.
- طيب حد فيكم يعمل في معروف ويروح يشترى لى كباية عرقسوس من عند الشربتلى اللي جنبنا ( تضع يدها في عبها وتخرج قرشًا تناوله لأحمد ) خد يا أحمد هات لى كباية عرقسوس بقرش ينوبك ثواب ..
- بتاع العرقسوس قفل ياحاجة .. النهاردة الحمعة .
- يابنى مابيقفلش لاجمعه ولاحد .. ده فاتح على طول انزل يابنى ربنا يهديك .. خد خسة صاغ ( تضع يدها في عبها ) عشان نشرب سواء ..
- ياه خمسة صاغ حته واحدة .. إيه ياحاجة الكرم ده ..
  - عطشانه .. ریقی ناشف .. حاموت ..
- سلامتك من الموت .. ده احنا فداكي كلنا ..

- ياخويا شبعت كلام ..

( ضاحكا على حاله ) واحنا حيلتنا إلا كلام
 دلوقت .

مراد – أنا رأيى واحد مننا ينزل عند البقال اللى تحت البيت .

چیچی – (مهلله) بقالة مخالی .. دی ملیانة میه مید معدنیة .. فکره هایله .

شفیق – وفیها سجق وبسطرمة وتونة وعیش فینو ولحمه بارده وتموین یکفی سنة ..

أحمد – ومعقول حايبقى لها وجود دلوقت .. دى زمانها هى واللى فيها بقت كوم تراب ..

مراد – ليه يا أخى .. ما احنا عايشين إهوه .. واحنا فى دور أول .. ما بالك بالدور الأرضى .. ده يبقى مخبأ ممتاز فى وقت زى ده .. أنا أراهنك إن بقالة مخالى مازالت قاية على جدرانها الأربعة سليمة زى ماهى ..

شفيق - معقول والله.

مراد - (یشاور علی دعامات الأسمنت المسلح فی الأركان) شایف أركان المسلح كلها سلیمة إزای .. یبقی معنی كده إن الدور اللی تحتنا سلیم .. والبقالة تبقی تحتنا بالضبط (یشاور علی أرضیة الغرفة) تبقی إزای حاتكون

مهدودة واحنا صالبين حيلنا كده.

شفیق – مام ..

أحمد - بس إزاى نوصل لها .. والسلالم مطربقة ..

مراد - ننزل من أى حفرة في الأرض .. زى عساكر المطافي .. ننزل على عرق خشب ..

أحمد – فكرة والله .. أما أروح أدور لكم على طريقة (يأخذ الشمعدان ويذهب من الباب الموصل إلى المغرفة التي انهار جدارها .. يبدو وهو يتجول .. ثم وهو يخترق بابا آخر .. ويختفى ) ..

الحاجة زنوبة .. صوتها يتحشرج ..

- شربة ميه (تتلفت حولها وتمديدها مستجدية)

الحاجة - ( مازالت تستجدى وكأنها لم تسمع الكلام ) خدوا

مراد - ياريت ياحاجة .. ماعادش يجيب حاجة ..

الحاجة – ( مازالت تستجدى وكأنها لم تسمع الكلام ) خدوا اللي حيلتي وادوني شربة ميه ..

يظهر أحمد وهو يتجول في الغرفة الثانية .. ثم

يدخل وهو يخفى شيئا وراء ظهره ..

آحد – (مبتهجا) أما أنا اكتشفت اكتشاف ...

الجميع - إيه .. إيه قول لنا .. الحقنا .. في عرضك ..

آحمد – كنز ..

الجميع - كنز إيه .. فين .. ورينا ..

أحمد – ( يخرج الشيء الذي يخفيه .. ويلوح به في يده ) ابريق ميه ..

الجميع - برافو .. أنت بطل .. مفيش منك ..

مراد – لقيته فين الأبريق ده ..

أحمد - ( محرجًا ) مش مهم بقى لقيته فين ( يناول الأبريق للحاجة لتشرب فتلتقطه في لهفة ) .

چیچی – (هامسة) ده أبریق دورة المیه .. اخص ..

مراد - ولو .. حد لاقى ..

الحاجة ترفع الأبريق على فمها .. وماتلبث بعد جرعتين ان تهزه .

- ده مافيهوش إلا نقطة واحدة .. ( نقطة واحدة .. واحدة .. واحدة .. يسقط في يد الجميع من جديد ويتبادلون نظرات الخيبة )

مراد – مفيش حل إلا بقالة مخالي يا أحمد ..

أحمد - إيوه بس نوصل لها إزاى ..

مراد – لازم كلنا ندور ..

أحمد - مفيش غير شمعدانين اثنين ..

مراد – مش مهم كل واحد ياخد شمعة في إيده أو يولع عود كبريت .

شفيق - أنا معايا علبة كبريت ..

لاشين – وأنا كمان معايا علبة (يتأكد من وجود علبته)..

يتفرق الرجال الخمسة كل منهم في اتجاه .. يبحثون عن مخرج .. كل واحد في يده شمعة .. أو عود ثقاب مشتعل ..

يبقى النساء والأطفال في الغرفة ..

چى - واحنا حانقعد كده مستنيين الموت ( تنزع شمعة من الشمعدان وتحملق في الظلام ثم تتردد وما تلبث أن تعيد الشمعة إلى مكانها .. وتظل قابعة حيث هي .. الأطفال يتكومون إلى جوارها ) .. لخظة صمت لايسمع فيها إلا حشرجة العجوز وعواء الرياح في الخارج .. ثم يدخل أحمد .. يبدو على وجهه اليأس ..

- مفیش فایده .. احنا مقفول علینا من کل حته .. مفیش حل غیر إننا ننط م الشباك ..

ينظر إلى النافذة .. حيث تتوهج الساء بحمرة مخيفة ..

أحمد - ( محدثا نفسه )خراب .. خراب .. في كل حته .. نفسى أشوف حياه .. نفسى أشوف حيوان .. نفسى أشوف حيوان .. ولو حيوان مفترس .. نفسى حشرة سامة .. ولو حيوان مفترس .. نفسى أسمع صوت إنسان في الوجود غيرنا .. ( ينهار جالسًا على الدولاب المقلوب ) نفسى

واحد عسكرى يقبض عليه .. نفسى في حرامي يسرقنى .. نفسى في قاطع طريق عليه سكتى .. موت .. موت .. موت .. في كل مكان (يتذكر فجأة) .. كان فيه هنا جرامفون . نفسى أسمع صوت غير صوتى .. أي صوت .. (يتجول في الغرفة وفي يديه الشمعدان .. يهتف في فرح) أهوه .. يديه الشمعدان .. يهتف في فرح) أهوه .. (يفتح الجرامفون) .. وفيه أسطوانة كمان .. (يدير اليد ثم يضع الابرة) .

یدوی صوت صباح.

أكلك منين يابطة.

أكلك منين

دى فراولتين في شفايفك

حلوین حلوین

هاتى واحدة لماما عشان ماما

عيونها الاتنين

عايزين ياكلوك ومش عارفه ياكلوك منين صوتها وسط الحراب يبدو غريبًا مفزعًا لشدة تناقضه.

يعود الرجال الأربعة على صوت الجرامفون .. ويتقاطرون من الحجرات المهدمة وهم يهتفون .. في وقت واحد ..

- إيه ده .
- مين بيغني ..
  - مين هنا ..
  - فيه إيه ..
- صوت إيه ده ···
- أحمد ( في هدوء ) : أكلك منين يابطه
- مراد ( فى خيبة أمل )يا أخى .. احنا قلنا الاذاعة جت .. يتهالك كل واحد فى مكانه بينها تمضى صباح فى الغناء ..

أكلك منين يابطة

أكلك منين

دى فراولتين في شفايفك

حلوین حلوین

هاتى واحدة لماما عشان ماما

عيونها الاتنين

أحمد - شوفوا احنا كنا زمان بنغنى نقول إيه .. الظاهر إن احنا كنا فاضيين خالص مش لاقيين حاجة نعملها ..

صباح مستمرة في الغناء .. صوتها يبدو غريبًا في الظروف الموجودة .. ومعانى الأغنية تبدو مضحكة .. غير ذات موضوع .

تنتهي الأسطوانة .. لحظة صمت .. كل واحد من

الموجودين ينظر في عين الآخر ..

مراد – وبعدين ..

شفيق - ندور الأسطوانة تاني.

مراد - لا .. أسطوانة إيه .. لازم نشوف طريقة نحل بيها مشكلة الأكل والشرب .. لازم نوصل لمخالى ..

لاشين - تاني ..

مراد – أنا عندى طريقة ..

لاشين - هيه ..

مراد – نحفر الأرض هنا .. وننزل على مخالى ..

لاشین - لو کنت فکرت فی حاجة زی دی زمان کنت خدت فیها عشر سنین سجن .

أحمد - ياريت حد طايل السجن دلوقت .. على الأقل حايلاقى فى السجن ناس .. مأمور وسجان ومعاون وكاتب وباشكاتب .. حايلاقى أمل ..

يامين يلايمني على عشر سنين سجن ..

مراد - أعوذ بالله .. فال الله ولا فالك ياشيخ ..

أحمد - واللي احنا فيه دلوقت حلو قوى عاجبك ..

مراد - على الأقل أحرار ..

أحمد - أحرار في إيه .. أحرار في إننا نتجول بين

أربع حيطان .. أحرار في إننا ماناكلش .. أحرار في إننا أحرار في إننا مانشربش .. أحرار في إننا نختار الموتة اللي نموتها بالسكتة أو الجوع أو بالعطش ..

مراد – أحرار في إننا نتجول في العالم كله.

أحمد - وفين هو العالم ( يشاور إلى الساء المتوهجة )
العالم بقى جهنم .. بقى أرض حرام ممنوع
فيها المرور لأى آدمى على قيد الحياة ..
إحنا دلوقت زى اللى بيرقص على قعر
كباية .. زى اللى واقف على شعرة بين نار
قدامه ونار وراه .. كل حريته إنه يتمشى
رايح جاى على الشعرة دى لغاية ماتقع بيه
وتنتهى الحكاية ..

شفيق - ياشيخ ياريتها تقع بقى وتخلصنا .. أنا تعبت ..

مراد – اثبت .. لايأس مع الحياة ولاحياة مع اليأس ..

شفیق – الکلام ده کان زمان زی اسطوانات صباح ..

أحمد - الكلام ده زمان ودلوقت وفي كل وقت .. الكلام ده هو اللي مش ممكن تقوم عليه القيامة أبدا .. الأمل هو الحياة

شفيق - طيب بس الحياة دى يلزمها تاكل وتشرب .. أحمد - حاتاكل وحاتشرب .

شِفيق – منين ..

- من عند مخالی ..

شفیق - (ضاحکا) مخالی دلوقت بقی حاجة زی أبواب السها ( یمد یدیه إلی أرض الغرفة فی ضراعة وتوسل) نظرة یا مخالی ..

مراد - (ينظر إلى الحاجة زنوبة في ابتهال) ادعى لنا ياحاجة .. يابركة دعاء الوالدين .. الحاجة في حالة إعياء يرثى لها .

مراد - ادعى إن أبواب السها تتفتح لنا ..

لاشين – أبواب مخالي

مراد – أنا مش قادر أصدق إن احنا مقفول علينا .. لازم فيه مكان ( يقوم ويتلفت حوله في الجدران في يأس ) لازم فيه مخرج .

الحاجة زنوبة - ( صوت متحشرج ) يارب إيه آخرة ده كله .. إيه آخرة الليل الطويل ده .

نفيسة – ( في شماتة ) آخرته الجحيم ( في شماتة هستيرية ) الجحيم للفجار ..

چیچی - (تصرخ فیها) أنا مش فاهمة لیه الشماته دی کلها .. ماأنتی معانا فی الجحیم اللی احنا فیه.

- نفیسه ( فی جنون ) أنا مش معاکم وعمری ماحکون معاکم .. أنا باتفرج علیکم .. الدنیا بتورینی فیکم ..
- چیچی یعنی قاعدة فی لوج .. ف بنوار .. حاتموتی فی تختروان ؟ ماانتی حاتموتی فی المخروبة دی معانا .
  - نفیسة یاکفار یافجار حاشوف عذابکم بعینیه. أحمد – (نی ذهول) نفیسه (یقترب منها)
- نفیسة ابعدوا عنی .. مش عاوزه حد یقرب منی .. أنتم بتعذبونی ( تبکی بحرارة ) بتعذبونی ..
- أحمد ( في عطف ) نفيسة مالك يانفيسة .. نفيسة تبكى بحرارة ثم تمسك نفسها .. وتمسح دموعها .. وتنظر في وجوه الموجودين وتغمغم ..
- نفیسة مش عایزه اَعیش .. ومش عاوزه حد یعیش .. عاوزه اُموت .. وعاوزه کل الناس اللی فی الدنیا تموت .. اُنا مش بحب حد .. ومفیش حد بیحبنی .
- أحمد ( في صوت رقيق ) إنت غلطانة يانفيسة .. أنا يحبك
- نفیسة إنت كذاب .. إنت بتكذب على .. كلكم بتعذبونى .. أنا بتكذبوا على .. كلكم بتعذبونى .. أنا وحيدة .. كنت دايما عايشة وحيدة .. عايشة

فى غابة ( تبكى بشدة ومرارة ) الدنيا بتاعتى كانت زى الخرابة المهدودة .. مفيش فيها طوبة على طوبة .. أنا باكرهكم كلكم .

أحمد – (يربت على كتفها بلطف) نفيسة نفيسة تخفى وجهها في كفيها ولاتجيب

أحمد – كلميني ..

نفیسة – مش عاوزة أكلم حد (تصرخ) سیبونی لوحدی (أحمد ينظر إليها كأنه ينظر إلى وحش جريح ولايتكلم).

الرياح تعوى بشدة فى الخارج .. صوت رعد .. صرخات خافتة .. چيچى تغطى عينيها .. ( أصوات ) يا ساتر ..

أحمد – ( في حيرة ) مش قادر أصدق إن إحنا حانموت .. كلنا حانموت .. الدنيا الجميلة دى حاتبقى عدم ...!!؟

أحمد يدور حول نفسه ويخطو في حركات آلية سريعة كحيوان سجين وهو يقدح زناد فكره .. أحمد : مش معقول .. لازم فيه حل .. لازم فيه مخرج .. مش ممكن نستسلم للموت .. مش ممكن غوت زى فيران في مصيدة ..

مراد الذي يدور هو الآخر ويلوح بيديه في يأس ..

يقف فجأة ويضيء وجهه كمن تذكر شيئًا .. ويخبط على جبهته .

مراد - افتكرت

أحمد - إيه .. افتكرت إيه ..

مراد - ( في انتصار ) المنور

لايبدو على أحمد إنه يفهم شيئًا ..

مراد – (موضحًا) المنور حايوصلنا للبقالة.

أحمد - المنور مايفتحش على البقالة ..

مراد - ( بصوت غامض ونبرة ذات معنى ) كان زمان مراد مابيفتحش .. لكن دلوقت الدنيا اتغيرت .. اللي بيفتح بقى مابيفتحش .. واللي مابيفتحش بقى بيفتح .. إنت نسيت إن البيت اتهد .

أحمد - أيوه صحيح ..

مراد – (يدور في المكان باحثًا ) فين شباك المنور ..

أحمد – على يمينك خد الشمعة دى معاك (يعطيه شمعة من الشمعدان) .. وحاتنزل المنور على إيه .

مراد يأخذ الشمعة ويخرج ويأتى صوته من الظلام حانشوف .

برق .. رعد .. صوت أمطار هادرة

صرخات خافتة .. چیچی وأطفالها یتحاضنون من الخوف .

السبكى - (وقد نفد صبره) وبعدين احنا حانقعد نستني إيه .. اما يتطربق علينا البيت .

لاشين – حانروح فين .

السبكى - ننزل من المنور مدام فيه سكة توصل .. لاشين - مش أما يرجع مراد يقول لنا لقى سكة والا مالقاش ..

شفیق – هو لو وصل لمخالی حایرجع لنا تانی .. ده حایفرش هناك ویبات .. ومنه مطعم .. ومنه مغیأ .. وأنت عارفه لما یلاقی منفعته ینسی اللی قدامه واللی وراه .

السبكى - أى والله صحيح .. دهدى طيب واحنا مستنين إيه .

يتجه إلى إحدى الشموع ويخلعها من مكانها في الشمعدان.

السبكى - هو شباك المنور فين.

أحمد – استنى ماتستعجلش أما نشوف مراد عمل إيه السبكى – ( وقد نفد صبره )قوللى بس شباك المنور فين أحمد – خش من الباب اللى عندك وبعدين حود ع اليمين

يخرج ويأتى صوته من الظلام

- أيوه الشباك مفتوح أهوه مطرح مانزل مراد حركة أمل وانتعاش بين الموجودين

لاشین - صحیح .. ماتیجوا نجرب حظنا .. تعالی یاچیچی

چیچی - آنا خایفة یاشفیق

شفیق – ماهی کلها موتة .. لو قعدنا حانموت م الجوع .. ولو طلعنا حانموت برده .. بس حاتبقی عندنا فرصة .

چیچی – لا .. خلینی أنا مع الولاد .. ولو لقیتو الجو أمان .. ابعتوا لنا .

السبكى - رجلى على رجلك يا شفيق ياخويا يخرجان

صوت الرياح تعوى بشدة فى الخارج .. رعد .. وبرق .. يعقبه صوت أمطار .. سيول كأفواه القرب

مدوح - الدنيا بتشتى

إلهام - صوت مطر

عادل – أنا خايف

أحمد - تعالوا جنبي ..

چيچى - تفتكر إنهم حايعرفوا يوصلوا لبقالة مخالى ..

- أحمد ينظر إليها في شرود ولايجيب ..
- چیچی کان حقنا اتشجعنا ورحنا معاهم ..
- أحمد دى مش الشجاعة .. ده الطمع اللى حركهم .
- چيچى ( فى بلاهة ) يعنى مش حايعرفوا يوصلوا للبقالة ..
- أحمد ( مازال شاردًا ) الطمع عمره مايوصل لحاجة (يتسمع صوت الأمطار الهادرة ) سامعة صوت الأمطار .. ( ينظر إليها في حزن ) الأمطار .. سيول .. ( ينظر إليها في حزن ) الميه حاتملاً المنور وتغرق البقالة ومش حايعرفوا يطلعوا تاني .
- چیچی (تصرخ) شفیق .. شفیق .. (تجری ناحیة المنور .. وتختفی فی الظلام .. مازالت تنادی شفیق ..
- چیچی ( صوتها آت من الظلام ) المیه نازله سیول .. سیول .. المنور غرقان لنصه .. المیه بترتفع .. حاتحصلنا حانموت .. حانموت ..
  - نفیسة ( فی فرح ) نفسی أموت ..
- چیچی (عائدة من الظلام) مش عاوزه أموت .. أحمد شوف لنا طریقة .. شوف لنا حل ..

(تتشبث بأولادها) بعد ربع ساعة الميه حاتغمرنا .. السها مفتوحة علينا زى القرب ..

( رعد وبرق وصوت أمطار هادرة )

چيچى - أحمد .. نعمل إيه

- شوف لنا حل ..

أحمد - نطلع الدور الثاني

چيچى - نطلع إزاى .. ومنين .. ومفيش سلم .. والحاجة نعمل فيها إيه ..

أحمد يميل على الحاجة يتسمع أنفاسها وقلبها .. ينظر في وجهها مليا ويمسك نبضها ثم يقول في هدوء:

- الحاجة سبقتنا .. الحاجة طلعت فوق .. فوق خالص .. في آخر دور .. في السها السابعة .. ماتخافيش عليها .. مفيش حاجة تقدر تحصلها دلوقت .. الله يرحمها (ينظر إلى أمه في احترام) متأسفين ياحاجة مش حا نقدر نقوم بالواجب ونعمل الشادر والصوان .. سامحينا يا حاجة .

چيچي - (تبكي) أحمد ..

- نفیسة (ترتمی علی أمها) أمی .. حبیبتی .. خدینی معاکی یا أمی ..
- چیچی أحمد .. إحنا حانموت یا أحمد ؟؟ .. هی الدنیا انتهت ؟؟
- أحمد لامش حانموت .. الدنيا لسه ما انتهتش .
  الرياح تعوى في الخارج .. الرعد .. البرق ..
  صوت الأمطار الهادرة ..
- خِیچی وحانعمل إیه دلوقت .. (أطفالها یبکون ویتشبثون بها)
  - أحمد حانطلع الدور اللي فوق ..
    - چیچی اِزای ..
    - أحمد حاندور على طريقة ..

يأخذ الشمعدان في يده ويتجول في الغرفات المهدمة

يتفحص كل مكان وچيچى ممسكة بكتفه والأولاد متعلقون بثيابها بينها نفيسة قابعة في مكانها إلى جوار الحاجة زنوبة لاتتحرك .. رعد .. برق .. صوت أمطار ..

أحمد - (ينادى) نفيسة فين .. (ينادى) نفيسة مازالت مرتمية على نفيسة مازالت مرتمية على

أمها .. وهى لاترفع وجهها .. ولاتجاوب على النداء ..

أجمد - ( صوته مبتعدًا في الظلام ) نفيسة .. نفيسة .. المسرح الآن لايظهر فيه سوى الحاجة الميتة وبنتها .. نفيسة ترفع رأسها وتخاطب الميتة في كلام كأنه صراخ ..

- أمى .. انتى فين يا أمى . ( تهز جسد أمها ) أمى .. العالم آللى انتى فيه شكله إيه يا أمى .. ( تهزها ) الناس اللى معاكى جنسهم إيه .. حد منهم بيحبنى .. حد منهم بيحب بيحب نفيسة بنتك .. ردى عليه .. جاوبينى .. أنا عمرى ما سألتك في حاجة .. ( تبتسم نفيسة فجأة وكأنها سمعت شيئًا ) صحيح .. كل الناس اللى معاكى بيحبونى .. وصحيح .. كل الناس اللى معاكى بيحبونى .. بيحبوا نفيسة .. صحيح يا أمى .. طيب .. خدينى معاكى .. استنينى .. أنا جاية لك .. أنا جاية لك ..

صوت أحمد مازال يتردد في الظلام .. نفيسة .. نفيسة .. نفيسة .. ولكنها لاتسمعه .. صوت مراد يسمع من أعماق المنور رفوف

رفوف محملة من كل صنف الأكل حوالينا من كل لون لكن مش قادرين نطوله احنا بنغرق .. بنغرق كل شيء بيغرق كل شيء بيغرق الأكل قدامنا .. ومش حائطوله الحقونا .. الميه نازله علينا من كل جانب أحمد

أخويا أحمد أخويا

أحمد ينطلق كالمجنون يدور حول كل المسالك الممكنة ثم يرتد في يأس وهو يزأر .

- مش قادر أنزل مفيش طريق

الميه سدت كل المسالك

صوت مياه وصوت إيد تطبش في المياه صوت مراد في صيحة أخيرة آتية من المنور تختنق شيئًا .

أخويا .. أخويا .. أخويا .

أحمد - (ينهار في مكانه وهو يغطى عينيه) بتقول أحمد - أخويا ؟؟! قلتها قلتها متأخر .. قلتها بعد

فوات الأوان.

رعد وبرق .. ورياح هادرة ..

ريح عنيفة تهب فجأة فتطفئ الشموع .. المسرح مظلم .. صرخة رعب .. تمر لحظة .. ثم يبدو أحمد وهو يتجول في غرفة مجاورة حاملا الشمعدان الوحيد الباقي .. الأولاد ممسكون به وأمهم مرتاعة متشبثة بكتفيه .. ويبدو أنه قد وجد سلمًا وأنه يصعد .

الدكور يبدأ في الاهتزاز .. زلزال خفيف يشتد شيئًا فشيئًا .. ريح شديدة تطفئ الشمعدان ويغرق المسرح في الظلام الدامس .

چیچی - (تصرخ) الأرض بنتهز .. السلم بیقع .. أحمد - إنت فین ؟ .. یاربی (صوت ارتطام أشیاء بعنف)

أحمد المسكو في ياولاد .. تعالوا هنا .. هنا أمان .. اوعوا تتحركوا .. ( يسكت صوته فجأة ) .. الأولاد يبكون ويصرخون ..

مدوج - أبيه أحمد إنت فين .. الهام - أبيه أحمد .. الهام - أبيه أحمد .. عادل - ماما .. أبيه أحمد .

لحظة صمت .. ظلام تام على المسرح

أصوات ارتطام تختلط بها أصوات أخرى آدمية من نوع آخر .. تضاء بطاريات كهربائية شديدة في الغرفات المهدمة .. وتدخل فرقة إنقاذ .. أربعة أفراد ومعهم رئيسهم يلبسون بدل سموكن وفراك غاية في النظافة .

فى المسرح الذى تضيئه البطاريات الشديدة فى كل مكان لايظهر إلا الأولاد الثلاثة على رف من الأرض غير منهار ..

لا أحد من الوجوه القديمة ..

كل الموجودين هم أشخاص بلا اسم فرقة الانقاذ .. وهم يعيدون تركيب الديكور في خفة وسرعة .. بعضهم يحمل معاول وبعضهم يحمل فرش طلاء .. وبعضهم يحمل أدوات كهربائية وكابلات وبعضهم يحمل سلالم .. وهم يعيدون بناء المسرح المتهدم بسرعة وحذق .

صوت الريح في الخارج يهدأ .. والأمطار تنقطع ..ولون السهاء يتغير من الحمرة المتوهجة تدريجيا إلى الزرقة الصافية التي يتدفق منها نور الفجر ..

واحد من فرقة الإنقاذ يحمل النجفة المحطمة ويعيدها إلى مكانها بالسقف .. ويوصل لها الأسلاك .. ويصلح العطب في التيار فيعود النور الكهربائي ليغمر المكان .. والآخر يعيد الصور إلى مكانها .. ويركب الستار ..

والثالث يرفع الدولاب .. كلهم يلبسون سموكن وسترات رسمية .. وملابس وطنية زاهية ملونة من جميع الأمم .. كأنهم سلك دبلوماسى .. حركاتهم وقورة .. وجوههم صارمة جادة كل شيء يجرى إصلاحه بسرعة ودقة حتى الكراسى المحطمة يعاد ترميمها .

ملابس الفرقة في غاية النظافة بالنسبة لأعمال الإصلاح التي يقومون بها .. وهم يقومون بأعمالهم في هدوء مريب بدون كلمة وبدون ابتسامة نراهم يتحببون إلى الأطفال ويقدمون لهم قطع الحلوى .. لايظهر أثر لأى واحد من أبطال المسرحية .. كلهم اختفوا .. لا أثر لأحد ..

الأطفال الثلاثة هم الوحيدون الذين بقوا على قيد الحياة .. نرى رئيس فرقة الإنقاذ يأخذهم بين ذراعيه .. يخرج بهم من المسرح وقد أعطانا ظهره .. ومن خلفه تتحرك بقية الفرقة بعد أن أعادوا المسرح إلى حاله .. نرى المسرح خاليا لمدة لحظة زمان .. ثم تنزل ستار الحتام .

## صدر للمؤلف

| ۲۳- الغابة                     | ١ – الله والإنسان             |
|--------------------------------|-------------------------------|
| ٢٤- مغامرة في الصحراء          | ۲ - أكل عيش                   |
| ٢٥– المدينة ( أو حكاية مسافر ) | ۳ – عنبر ۷                    |
| ۲۷– اعترفوا لی                 | ٤ - شلة الأنس                 |
| ۲۷ - ۵۵ مشکلة حب               | ه - رائحة الدم                |
| ۲۸- اعترافات عشاق              | ٦ - إبليس                     |
| ٢٩- القرآن محاولة لفهم عصرى    | ٧ – لغز الموت                 |
| ٣٠- رحلتي من الشك إلى الإيمان  | ۸ – لغز الحياة 🕒              |
| ٣١- الطريق إلى الكعبة          | <ul><li>٩ - الأحلام</li></ul> |
| # - TT                         | ١٠- أينشتين والنسبية          |
| ٣٣- التوراة                    | ١١– في الحب والحياة           |
| ٣٤- الشيطان يحكم               | ١٢- يوميات نص الليل           |
| ۳۵ رأیت الله                   | ۱۳ – المستحيل                 |
| ٣٦- الروح والجسد               | ١٤- الأفيون ( سيناريو )       |
| ٣٧- حوار مع صديقي الملحد       | ١٥- العنكبوت                  |
| ٣٨- الماركسية والإسلام         | ١٦- الخروج من التابوت         |
| امحد -٣٩                       | ١٧ – رجل تحت الصفر            |
| ٤٠- السر الأعظم                | ١٨- الإسكندر الأكبر           |
| ٤١ - الطوقان                   | ١٩ - الزلزال                  |
| ٤٢– الأقيون ( رواية )          | ٢٠- الإنسان والظل             |
| ٤٣- الوجود والعدم              | ۲۱- غوما                      |
| ٤٤- من أسرار القرآن            | ٢٢- الشيطان يسكن في بيتنا     |

٥٥- من أمريكا إلى الشاطئ الآخر
 ٥٥- أيها السادة الحلموا الأقنعة
 ٥٥- الإشلام ... ما هو ؟
 ٥٧- هل هو عصر الجنون ؟
 ٥٨- وبدأ العد -المتنازلي
 ٥٩- حقيقة البهائية
 ٥٩- السؤال الحائر
 ٦٠- السؤال الحائر
 ٦٠- سقوط اليسار

20- لماذا رفضت الماركسية -27- نقطة الغليان -27 عصر القرود -27- عصر القرآن كائن حَىّ -28- القرآن كائن حَىّ -29- أكذوبة اليسار الإسلامي -0- نار تحت الرماد -01- المسيخ الدجال -07- أناشيد الإثم والبراءة -07- جهنم الصغرى -07- جهنم الصغرى

## \* مجموعة المؤلفات الكاملة \*

صدرت فی بیروت عام ۱۹۷۲ مقصص مصطفی محمود روایات مصطفی محمود مسرحیات مصطفی محمود رحلات مصطفی محمود

حازت رواية « رجل تحت الصفر » على جائزة الدولة لعام ١٩٧٠

| 1997/0970 |               | رقم الإيداع    |  |
|-----------|---------------|----------------|--|
| ISBN      | 977-02-5421-5 | الترقيم الدولى |  |

۱/۹۷/۲۰ طبع بمطابع دار المعارف ( ج . م . ع . )



## هذه المجموعة

تحرص دار المعارف دائيا على تقديم الأعمال الكاملة لكبار المفكرين والأدباء. والدكتور مصطفى محمود واحد من هؤلاء الذين أخلصوا للقلم. فأثرى ساحة الفكر والعلم. وطَرَقَ أبوابًا جديدة لم تفتح من قبل. فتنوع إنتاجه بين القصة والرواية والمسرحية وأدب الرحلات. إلى جانب تلك المؤلفات التى تحفل بالنظرات المعاصرة للفكر الديني والمقارنة بالنظرات العلمية الحديثة. والتي لاتزال تثير مزيدًا من الجدل المفيد.

وقد امتد تأثير فكر الدكتور مصطفى محمود إلى القراء العرب من الخليج إلى المحيط كها ترجمت بعض أعهاله إلى اللغات الأجنبية شاهدة بقدرته على العطاء المتميز المتنوع.



دارالمعارف

1./00/13.



726 5zi